

東
華
續
錄

東華續錄

乾隆六十三

臣王先謙敬編

臣周爾蕃恭校

乾隆三十一年丙戌春正月壬申諭朕統御萬方孜孜求治惟以愛育黎元爲念自御極以來蠲賜所逮不下千億萬乾隆十年會恭依皇祖普免直省錢糧恩例蠲除天下額徵正賦二千八百萬有奇期斯民家給人足咸臻樂利惟歲運漕米向以供給俸餉康糴之用非水旱特蠲例不普免夫八政以食爲先閭閻蓋藏尤冀饒裕恭閱皇祖實錄康熙三十年特頒恩旨將各省起運漕糧通行蠲免一周大澤均霑慶逾常格仰惟皇祖沖齡踐阼臨御之三十年春秋未及四十朕年二十有五始登大寶膺祺受祉迄今亦閱三十年際重熙累洽之會必世昌期均符泰運其爲

慶幸倍深茲荷蒙 上天眷佑 烈祖鴻庥函夏謐甯疆宇式開
北庭西域二萬餘里咸隸版圖外有耕田之種內無餽餉之勞且
連歲年穀順成庶物豐殖京通倉貯儘有餘粟 天既誕貽樂歲
惠洽昇平朕自當仰體 天心以推恩黎庶是用敬承 嘉貺懋
繼 前謨使薄海億兆並裕倉箱之慶所有湖廣江西浙江江蘇
安徽河南山東應輸漕米著照康熙年間之例於三十一年爲始
按年分省通行蠲免一次其江甯京口杭州荊州等處駐防地方
該省漕米旣蠲所有估需兵食如何豫爲籌備並各該省蠲免次
第應行酌辦各事宜著該部速行定議具奏尋議各省歲輸漕糧
請照康熙三十年分年蠲免之例再加籌酌三十一年免山東河
南二省三十二年免江蘇省三十三年免江西省三十四年免浙
江省三十五年免安徽省三十六年免湖南省三十七年免湖北

省以次遞免其隨漕銀米應照舊例輪免之省停運丁船例給減
半本折月糧在漕項款內動支餘存銀米報部撥用有漕省分兵
米杭州荊州豫東等處於地丁徵收兵糧款內動支江甯於漕項
米內支給均無庸另行籌辦惟京口向於起運漕糧內截撥三萬
七千餘石今漕糧已免應照江甯之例照數撥給從之○甲戌給
浙江天台等三縣貧戶一月口糧並仁和等六縣災民籽種○免
甘肅靖遠等十四廳州縣二十三年至二十九年陝西延安等三
府州屬二十一年至二十五年民欠銀糧○辛巳諭前因高晉審
擬段成功一案稱係該員患瘧昏迷以致家人龔玉等婪贓等語
朕以高晉審理此案甚屬錯謬因降旨嚴行申飭並令明德據實
查奏今據奏稱段成功家人龔玉出票滋擾段成功俱屬知情其
中尙有染指之處承審之蘇州府孔傳炯主臬審轉之臬司朱奎

揚明知其裝病瞻徇未究等語朱奎揚素非善類不過因其歷任
年久尙無顯過是以擢任臬司至孔傳炯人似幹練經朕特加擢
用調補繁缺乃承審參案輒敢瞻徇姑息希圖蒙混了事深負朕
恩朱奎揚孔傳炯俱著革職交刑部治罪其成招會轉之布政
使蘇爾德雖無承審專責但以藩司大員若果持正爭執朱奎揚
等豈能施其伎倆乃竟扶同會轉亦難辭咎蘇爾德著交部嚴加
議處至從前會審之候補知州德甯安雖亦審理不實念係微員
尙與藩臬有閒著交部察議朕辦理庶務一秉大公情罪輕重悉
視其人自取邇來吏治肅清外省審理參案從未有敢於顯然袒
庇至此者高晉辦理此案實出朕意想之外著將前此申飭高晉
諭旨鈔發與眾閱看並將此通諭中外知之○以李永書爲江蘇
按察使

由蘇松
道遷

○壬午雲貴總督劉藻等奏永昌順甯二府所屬

之耿馬孟定孟連等土司地方界連緬國惟藉滾弄江爲天塹年來土司懦弱失防每有土匪偷渡滋擾之事近據永順鎮永昌守稟報木梳莽已覺領兵到木邦猛店地方駐紮向耿馬索取舊規不給卽渡江來襲又據順甯守稟報莽子竄入孟連地方並及闕空有人七百馬七匹各等情查該匪兩路分進是否虛實其人眾若干未據確探且旣稱索取耿馬舊規其竄入孟連又因何事隨飛檄永順鎮府會差土練偵探該匪已拔營退去查木賊莽已覺卽布普拉因臺卡嚴密無隙可乘退歸屬實第夷性叵測且耿馬土司罕國楷已故恐有乘閒潛窺之事是滾弄江之防範未可一刻稍疏已分行永順鎮府嚴飭各土司督率目練常川防守庶俾耿馬無虞得旨知道了不可苟圖了事戒之○癸未論前因高習癘擬段成功一案稱該員患瘧昏迷以致家人書役焚賊等語辦理

甚屬錯謬是以降旨將該督嚴行申飭並令明德查出實情將承審之孔傳炯朱奎揚等革職拏問並將申飭高晉諭旨令眾閱看今據四達會同該督究出此案出票婪索皆係段成功親筆標發實有染指等弊則段成功之情罪已無疑義而高晉摺內並稱莊有恭原參卽有段成功抱病被蒙字據實可駭異莊有恭既訪知段成功有出票婪索之事具題參劾豈有復信其捏病被蒙之理伊彼時若仍任江蘇巡撫決不肯如此姑息了事亦不肯爲此隱躍兩可之語其意不過以五日京兆離任在卽何必結怨故留此罅隙卽使他日審出實情伊可居救之不得之名如因捏病一節得以藉端開脫卽可解怨市恩此等卑瑣居心行事尙安得爲純臣乎至高晉如此據實覆奏若令尹繼善身處其地不過具摺引罪而已必不詳奏及此蓋高晉因朕洞鑒確情伊又係初任總督

恐罪及己故和盤托出耳今尹繼善見在朕前惟有俯首心服卽問之各省督撫朕於此諸人微暖窺見底裏確中與否諒亦不能爲之置辭也莊有恭原參抱病被蒙一語實出意想之外因令內閣檢取原本閱對則有本官抱病家人蒙官舞弊之語並詢問莊有恭據稱該司府等審究龔玉等僉供段成功時適患病係伊等蒙蔽所爲隨據揭敘稟題參未能卽將段成功斷非患病之處明白指駁實屬錯謬此語更屬取巧莊有恭若果知其實患病則又何必嚴參其所以嚴參者蓋恐後任參出朕將問及故不得不參而爲之隱躍其辭耳莊有恭受朕深恩特加擢用乃敢爲此巧於市恩之術此非前任受尹繼善局弄之過可比是有心欺朕矣莊有恭著嚴加議處高晉雖奏稱莊有恭原參有抱病被蒙之語伊審辦時卽應究出實情何竟聽屬員袒庇開脫遂爾扶同率結舛

謬殊甚並著交部嚴加議處外省上和下睦之習最爲惡陋屢經整頓懲創庶幾稍知改悔不謂尙有復蹈故轍若此者伊等其以朕爲何如主而敢以此等伎倆巧爲嘗試耶當此綱紀肅清之時而伊等錮習牢不可破實所深恨諸臣當痛加前洗毋得自罹罪愆朕必欲力挽頽風法在必懲勿謂言之不豫也將此通諭中外知之○丙戌諭楊應琚覓赴雲南有交辦事件著馳驛前往○雲貴總督劉藻奏總兵劉德成等報稱十二月十九日攻九龍江一路破賊營一座二十日攻橄欖壩一路破賊營六座又據報稱二十一日官兵行至猛往莽遇莽匪由山箐夾衝將軍裝搶去遊擊明浩被賊鏢傷參將何瓊詔等不知下落遂差弁往查飛檄防兵土練前往應援並咨會提臣達啓等相機接應二十四日又據整控差弁面稟何瓊詔等已沒於賊查整控江有山僻小徑可至普

洱府城軍需銀兩及火藥軍裝悉貯於此所繫更重乃暫至普洱駐紮至何瓊詔等原令其在整控江防匪竄入乃不舉軍令妄圖邀功輕進致敗罪有攸歸謹由四百里馳奏得旨如此軍機何不卽用六百里飛遞適又據常鈞奏報刀派先一案並有旨諭卿總之此事似不可中止小小懲創了事莫若大舉以靖其源或俟兵威齊集再行進發亦可卿止宜調度鎮撫攻戰之事應督催達啓奮勇爲之綠旗兵已不足稱勇況土練乎若再加以詐僞更不可問矣此最宜留心者諭軍機大臣等劉藻奏進剿莽匪情形一摺已詳悉批諭矣該督因整控江有山僻小徑可通普洱因回至普洱府駐紮防守所見亦是但此等莽匪敢於抗拒官兵非小小懲創所可了事况綠旗兵本不能勵勇衝鋒而其素習詐僞更不足信若調遣無多輕率前進旣於征剿無益且恐賊匪輕視官軍

轉得肆其猖獗該省各鎮協駐兵不下數萬自應調遣精銳以供驅策此時不妨暫爲整兵解鎮俟各路兵調集後卽行鼓勇前進扼要剿擒俾賊匪無從竄逸庶得盡絕根株以清邊徼至摺內稱十九二十等日由小猛養分兵渡江攻九龍江橄欖壩等處並有捷獲今按圖內道里詳爲記誌則橄欖壩等處在小猛養之前猛往在後官兵旣分路剿截何以莽匪復得潛越小猛養渡江退至猛往竄伏以致衝散官兵明浩何瓊詔等有遇賊被傷之事其理殊不可解此非繪圖有舛卽係所報不實著將朕硃筆記誌之圖發去該督細看自知仍著另繪詳細清圖註明貼說呈覽軍行要務奏報宜速此後如有應行奏聞機宜俱由六百里馳遞將此傳諭劉藻知之又諭據常鈞奏永順邊境木匪滋事請俟普洱莽匪辦有端緒再將孟連土司之案辦理一摺所見亦是前於乾隆二

十八年開曾經降旨以此等鼠竊狗偷原屬不成事體止可如此辦理係就彼時情形指示若匪徒敢於侵擾邊境則當搗其巢穴務使根株盡絕自無庸拘泥前旨但普洱莽匪見經劉藻率兵進剿若將木匪一案卽於此時併辦該處地壤相錯恐致彼此勾連難於速結著將此摺鈔寄劉藻閱看令其於辦竣莽匪之後次第接辦至劉藻見在追擒莽匪前已傳諭令其不得扭於書生之見意存姑息稍爲寬縱况總督旣已親行督兵進剿設復苟且了事轉使此等醜類罔知畏懼何以申國威而示懲創但劉藻本係文臣軍旅非其所習不必勉強臨陣若居中調度審機宜而彰賞罰尙係力所能爲達啓見在同往普洱伊身係滿洲且曾經出兵可責令其統率兵弁買勇進剿以期肅清邊界該督辦竣此事後卽將木匪一案嚴行查辦亦不得稍示姑容草率完結至該撫所奏

孟連土司刀派先係緬甸國支裔應襲土司之刀派新時與緬甸
往來一節從前該督撫等何以並未奏聞此種夷性叵測使恣其
交結或致漢奸從中勾引易滋事端亦不可不防其漸自應嚴行
禁止但見在辦理進剿事宜此事不必卽時查辦俟剿滅莽匪後
該督撫等再就該處情形會商妥協辦理可將此傳諭劉藻常鈞
等知之又諭見在征剿莽匪一應軍務均須調度得宜總督劉藻
辦理地方事務素屬妥協然究係書生未嫻軍旅設於用兵機宜
稍有不當旣於剿賊之事無裨而用違其材亦非朕所以成全劉
藻之意楊應琚久任陝甘籌辦軍需事務伊所熟諳楊應琚著調
補雲貴總督吳達善著調補陝甘總督湖廣總督員缺卽著劉藻
調補此旨且不必頒發該督見在普洱調集官兵督率攻剿恐此
旨一經宣示未免屬員等意存觀望呼應不靈所有一應軍務該

督仍實心妥協辦理不可存聊待後人之心俟楊應琚到滇後再行一一交代起身赴湖廣新任著將此傳諭知之○戊子劉藻奏據總兵劉德成連次報稱由大渡口進攻莽匪奪獲土鍋寨賊營一座攻破九龍江賊營三座參將劉明智等分翼夾攻砍開白塔寺賊營一座土弁叭先捧率練追入雙龍寺賊營殺賊甚多官兵會合連踏賊營五座分兵搜伏將小渡口一帶賊營悉行焚燒乘勝奪回宣慰土城一座見在合兵暫紮江地俟探明賊巢再行進攻查莽匪東竄西突日集日多橄欖壩一路隔江拒壘九龍江一路擁眾迎敵整控江一路伏箐夾衝復於土鍋寨圍困官軍非大加攻擊直搗巢穴盡爾野夷罔識國威且不乘此時添兵深入一屆三月瘴癘盛行官兵不習水土便難攻戰反致多糜帑項目前雖大挫其鋒而整哈猛遮等處尙多肅聚整控江外土城亦多未

平官兵不敷分遣遂加調提標楚姚開化等鎮營官兵及臣標兵約共二千餘名迅赴軍營剋期掃蕩得旨是迅速齊力前進不可徘徊誤事又奏據劉德成報稱正月初七日晚間令遊擊施聖學選熟悉路徑之土目暗渡驪山探得莽賊於整哈江岸把守極嚴江岸後有營四座去江稍遠不甚防備遂於是夜二更派土千把帶練攜硫磺硝火礮火箭等物由上流渡江抄出賊營後分伏左右又另派兵練於江外之蠻紅抄伏賊人歸路並派員保護糧石兼堵江口去後於初八日申刻據該遊擊等同稱昨渡江至四更甫畢分投潛伏土弁領練將火礮等物一齊引著拋入賊營火光並起伏兵齊出槍礮並施賊眾亂竄被兵練砍殺及火燒槍斃者徧野堵江餘匪聞聲赴援官兵堵截賊不能進復奔江岸被槍傷斃無數查此次夜襲賊營斬殺甚多整哈渡已經打通但據稱

猛遮一路賊匪恃險固守所得土司土城猛海猛阿猛往等處皆連營直接整控江岸應俟添兵到時方能一鼓蕩平直搗巢穴得旨小小之捷何足豔稱且緣旗虛詐之習止可信一半耳常鈞奏永昌順甯二府屬邊外耿馬土司稟報探聞木梳木邦確情並孟連猛遮連界應次第查辦情形查莽匪木賊在外域原屬相連雖彼此各分畛域其實狐羣狗黨忽東忽西總恃其荒僻劫掠本無定向今據報木梳訓練情形似實而日久安靜是該匪等詭詐謀爲聲東擊西安知非別往外域滋擾又安知非見在九龍江猛遮等處之莽賊卽係若輩且見有莽匪五十人至孟連要孟連助攻猛遮之事則野夷之彼此句結已可槩見惟夷情雖難豫定而邊防尤不可不嚴見酌會督臣就近查詢見在占據猛遮之莽子是否則係召散木匪果否爲追索召丙啓釁且木梳木邦前調之練

或仍有潛藏窺伺耿馬孟連之意亦未可定九龍江已報大捷賊匪聞風喪膽勢可解散其督臣續調之永順鎮騰越協營兵到日已可無須勦辦報聞○庚寅吏部議奏前任江蘇巡撫莊有恭題參蘇州府同知段成功並不據實嚴參巧爲解怨市恩之地應照例革職兩江總督高晉扶同審結應照例降調得旨莊有恭於題參重案巧爲解怨市恩如此居心豈可復留綸扉之任著革去協辦大學士餘侯四達等審明到日再降諭旨高晉著革職從寬留任○辛卯兵部奏侍郎五福家炭戶領票燒炭前於雍正元年停止王公炭票時旣已蒙混未經革除及五福身爲大臣明知炭票不應請領又不報停以致領票辦炭之人藉端滋事應交部嚴議其炭票永遠停止諭五福身爲工部堂官乃於早應革除之炭票不行停止以致匪徒認充炭戶影射生事甚屬不合五福著革去

工部侍郎降爲頭等侍衛管理圓明園茶膳房等處事務仍著嚴
察議奏○調程景伊爲工部侍郎何運僊爲吏部侍郎以吳紹詩
爲刑部侍郎

鳳閣甘肅
布政使

○甲午諭前因朱奎揚孔傳炯原審段成

功焚賊一案一任該員捏病狡飾其中必有授意指使之人當經
降旨四達等令其嚴行究訊務得實情具奏今四達等訊據孔傳
炯供段成功參後飭審時曾經莊有恭面諭如果他家人書役不
供出段成功知情得賊也就罷了又朱奎揚供面見莊有恭曾面
諭段成功一案府審止係家人書役得賊段成功不知情可照此
揭參竊窺莊有恭意在從寬遂亦不加深究各等語此實出情理
之外深可駭異矣朕初意莊有恭不過因離任在卽爲解怨市恩
之巧計然亦不過隱躍其言後任審虛伊固可市恩卽使審實亦
可居救而弗得之名此尙外省所素有之惡習耳是以吏部議將

莊有恭革任時僅將伊協辦大學士革去俟四達等查奏到日再降諭旨今閱四達等所奏此案之上下相蒙俱由莊有恭授意指使以致臬司知府扶同欺混其居心欺詐若此實非意料所及莊有恭從前學政任內接收大逆丁文彬逆書不行奏辦一案巡撫任內將應擬纓首之朱聘擅行准贖外結一案已疊獲重罪皆經棄瑕錄用復加恩升授尙書協辦大學士朕之施恩於莊有恭者有加無已苟稍有天良自應實心圖報乃於將次離任之時敢於參審重案授意屬員巧爲欺蔽深負朕恩此皆朕之不能以德威人以明識人深用爲愧若再姑息其過何以董正天下督撫哉莊有恭著革職交刑部軍機大臣會同該部嚴審定擬具奏又諭莊有恭前在學政任內有應罰未完銀兩曾經加恩寬免今莊有恭於段成功一案如此喪心負恩所有從前寬免之項仍著照數

追繳○署內閣學士徐以烜因病乞休允之○乙未論向來各省督撫辦理案件瞻徇欺蒙上下通同舞弊習氣最爲惡劣前歲湖北盜犯張洪舜一案經朕徹底查辦嚴加懲治以爲各省督撫自應悚慮洗心奉法惟謹乃未及三年不意又有罔上行私毫無顧忌如莊有恭之甚者可見各省督撫之錮習相仍牢不可破段成功詐擾累民賊蹟顯著莊有恭身任巡撫不思秉公參究轉授臬司知府令其委罪家人書役巧爲開脫以遂其解怨市恩之計居心欺詐飢法負恩莫此爲甚此而不痛加懲創其何以飭吏治而正人心故將伊革職拏交刑部令軍機大臣會同審擬外聞無識之徒未必不以此案較之湖北案情爲輕而處之則同不知張洪舜止係細民盜犯愛必達等並非有意袒徇乃因迴護已過遂將後案延擱然究未敢公然授意屬員乃屬官承其意指相與顧

預了事耳若段成功身爲職官索詐部民情節可惡莊有恭惟知
官官相護罔知法紀於查參段成功時輒先授意承辦之臬司知
府令其從寬開脫遂爾隱躍其詞以患病被蒙參劾若非朕留心
詳閱洞燭其奸則貪黷擾民之段成功幾致倖逃法網是此案之
挾私舞弊實倡於莊有恭其罪更浮於愛必達矣且愛必達已經
發遣伊犁並不稍爲寬貸今朱奎揚孔傳炯供詞具在案情歷歷
如繪稍有知識者閱之尙能爲莊有恭置一辭乎昨四達等奏到
卽令軍機大臣將朱奎揚等親供交莊有恭閱看伊惟俯首認罪
並不置辨其意以不屑與屬員對簿自謂得體不知實小人之尤
豈有如此重案聽其含糊認罪而遂可成信讞之理因命軍機大
臣等復行傳旨訊問則又供朱奎揚等承查月餘延挨觀望直至
莊有恭自行訪有款單札司轉府拘審伊等始將家人書役勒詐

得賊情弊具揭又不將段成功自己標判磨卷回明送看等語所
供情節亦係一面之詞難於憑信卽日朱奎揚擊解到京彼此質
證自可得其底裏設稍有枝梧掩飾亦何難加以嚴鞠使之水落
石出耶外省吏治弊壞皆由督撫不能正己率屬專以上下和同
聯爲一氣以行其蒙蔽欺詐之伎倆各省皆所不免而江南爲尤
甚在伊等相習成風恬不爲怪不思此等鬼域形迹斷難逃朕洞
鑒一經敗露惟有力加整頓執法不撓務在廓除積習俾吏治肅
清該督撫等各宜猛省自愛毋得以身試法將此通諭各直省督
撫等知之○調李侍堯署刑部尚書董邦達爲工部尚書以張泰
開爲禮部尚書范時綬爲左都御史調陸宗楷爲吏部侍郎以史
奕昂爲兵部侍郎

服闋廣東
布政使

二月壬寅諭前據劉藻等奏莽匪不法侵擾土司邊界曾降旨令

其嚴行勦捕勿以姑息了事嗣據奏報攻勦九龍江橄欖壩諸寨已獲全勝惟參將何瓊詔遊擊明浩等派赴整控江防禦該弁等不遵軍令冒昧渡江以致遇賊失事彼時卽疑所奏未必盡係實情今據奏何瓊詔明浩前後回營因將伊等參奏審擬治罪已交軍機大臣會同法司覆擬具奏第該督辦理此案情節甚屬含糊紕繆何瓊詔明浩等委赴整控江防堵莽匪前至猛往遇賊敗逃又復謊報身死此其法所難宥處該督乃奏稱冒昧前進致失事機是伊等反覺可嘉何罪之有夫伊等所謂貪功輕進並非實情不過緣營虛誑欺飾故智耳況該督所訊供詞於緊要情節全未問及卽如該督初報何瓊詔等俱歿於賊及伊家人呈繳關防時卽應詳究其是否打仗陣亡抑係窘迫畢命或回營後畏罪自戕以定情罪乃惟任弁兵張皇謊報信爲實事一切槩置不究及何

瓊詔等陸續逃歸該督又不究從前謊報情由治以畏葸退縮之律尙信其一面虛詞謂係輕進失事其何以申軍律而懲欺罔乎卽如何瓊詔所供架著藤牌撲殺並稱被莽子刀戳其馬連馬滾跌入江之語試思馬上豈能使用藤牌此其枝梧捏飾難以欺三尺之童者而劉藻竟坐受其蒙混而不覺不更可笑乎又如前次所報官兵六百人過江遇賊被傷約贖二百餘人陸續回營者一百餘人而此次奏稱見回思茅兵丁高士德等一百五十五名則合之前此回營之兵固所傷無幾且安知此未回之一百餘兵亦非敗逃藏匿則從前所謂遇賊被傷之說更不可盡信矣又前摺奏明浩等兵器皆馱載行裝猝遇賊人不及措手以致敗衄而此次摺內稱兩相對敵因火藥已盡勢不能支前後自相矛盾該督於此等喫緊關鍵處全不細心根究何憤憤乃爾劉藻本屬書生

軍行機宜非所嫻習故朕不肯責伊以所不能至於調度實罰諸事尙可力爲籌辦乃於審訊此案情節竟舛謬若此豈堪復勝總督之任劉藻著降補湖北巡撫達啓身爲滿洲何至懵懵盡諾伊二人著交部嚴加議處總兵劉德成著交楊應琚查明再降諭旨見令楊應琚前往接辦軍務楊應琚未到之先劉藻須實力經理若稍存五日京兆之見以致貽誤事機必更重治其罪向因緣營積習浮誕不堪故西陲用兵全未藉此輩也今雲南一案如此可見伊等錮習全未能悔改各該督提等務須實力整頓毋稍姑息將此通行曉諭知之○諭軍機大臣等劉藻前後奏報攻勦莽匪一案惟任緣營捏飾據稟具奏辦理全未允協已將伊降補巡撫並將辦理錯謬之處降旨宣諭矣此種莽匪鼠竊狗偷原屬不成事體何至今其肆行侵擾敢於抗拒官兵跳梁邊境皆由該督等

平日不能實力整頓遇事嚴懲遂致匪徒積玩無忌曠成事端然此必非一朝一夕之故大約滇省諸務廢弛已久不獨劉藻見在辦理不善卽從前吳達善等所辦恐亦未能妥協著交與楊應琚到任後詳悉查訪務得確情據實奏覆備有不實不盡之處經朕別有訪聞或經發覺惟楊應琚是問本日所降諭旨並劉藻各摺並著鈔寄楊應琚閱看著將此傳諭知之○以定長爲湖廣總督調李因培爲福建巡撫常鈞爲湖南巡撫楊聘爲雲南巡撫由湖北遞調○甲辰 上御經筵○丙午諭蒙古內元清吉斯汗之裔均係博爾濟吉特氏而元史內稱元帝爲奇渥溫氏以漢字譯蒙古文間有語音不合處然亦不至如此河漢見在校正史書書內外誤甚多而汚蠟蒙古之語亦不一而足不可不爲之前雪成衮扎布係喀爾喀舊人或伊得自傳聞或該處舊有記載著傳諭令其查

明具奏外並交理藩院亦行文內扎薩克查伊等有無傳聞記載之處令其各自聲明報部由部彙題奏聞○庚戌 上啓鑒謁

東陵○四川總督阿爾泰提督岳鍾璜奏據維州副將同知稟稱上年十二月二十五日半夜聞黨壩額碛一帶槍聲不絕遂令該土司前往接應見金川番眾聚集圍攻並於格藏嘉噶爾河設卡截斷額碛道路至二十八日將額碛攻破占據用礮轟擊黨壩格藏官寨經駐紮綽斯甲布千總袁國璉撥兵救援又於正月初一日催到從噶克土兵援助已將金川新設營卡攻開番眾見據額碛山梁拒守又據打箭爐遊擊同知稟稱十二月二十八日至正月初一二等日金川同布拉克底聚眾攻圍巴旺卡卡角燒毀寨房殺擄人口詢係巴旺頭人陸塔爾弟兄勾引見飭革布什咱等土司星速赴援初四日與金川戰於羅哩地方奮力擊退等語查

黨壩巴旺地小兵單今被金川分路滋擾亟需援助見飭綽斯甲布三雜谷小金川革布什咱各土司併力協攻務期捷勝得旨看此光景金川又略有猖獗之勢究當如何制勝不可隱飾姑息○辛亥諭四達等審擬段成功詐擾焚賊一案請將從前保舉堪勝知府之上司查明議處段成功係和其衷所保按例自有應得處分但聞段成功在陽曲縣任內曾有虧空當升用同知離任時上司代爲彌補朕以爲若果有此情節則和其衷之罪更不止於濫舉匪人是以諭令彰寶確實查奏今據奏到段成功於升授同知時虧空銀一萬兩以外上司知情彌補俱屬確實此事可謂大奇從前蔣洲虧空庫帑勒派焚賊一案經朕大加懲治方謂凡有人心者皆當知所做懼而省覆轍在前尤當引以爲戒不意未及十年復有上下關通營私欺罔若和其衷之甚者實出朕意料之

外是其罪較莊有恭更重矣莊有恭參段成功時故爲隱躍其辭
市恩解怨已屬有心取巧和其衷明知屬員虧空盈萬不但不參
劾究治轉爲出貲伙助掩飾彌縫其玩法欺蔽之罪尚可貸乎若
和其衷因曾經保舉恐參出虧空致罹罪愆不知上司保舉屬員
豈能保其終身之必無過失或當時見爲能事則登之薦剡及其
劣蹟昭著卽予以糾劾原屬兩不相妨且以見封疆大臣立心公
正朕方嘉予之縱使議以濫舉處分亦不過止於降調朕尙予以
從寬留任從未因此等吏議將舉主遽行罷斥和其衷久膺外任
豈尙未深知而必爲此委曲隱蔽之事殊不可解且段成功僅一
縣令何至虧空如許之多卽云首邑用度較繁亦不應妄費若此
而通省各上司何以互相容隱竟無一人舉發其事和其衷甚至
給銀五百兩代爲湊補是段成功平日必有交結逢迎之處不可

不徹底根究若和其衷竟受其餽送遂爾曲意周旋則更不能稍稽刑憲矣和其衷前次曾獲重愆經朕棄瑕錄用擢至巡撫竟敢如此徇私藐法深負朕恩和其衷著革職拿問派四達前往山西會同巡撫彰寶將此案各情節秉公嚴審定擬具奏並著舒赫德前往甘肅將和其衷鎖拿就近訊問明確卽遴委幹員押解山西質審至文綬係專管錢糧大員明知屬員虧空縱容彌補劉墉係親臨知府並不揭報虧空通同容隱按察使藍欽奎前任冀甯道富勒渾知情不舉均非尋常徇庇可比俱著革職交與四達等將有無授意及助銀彌補之處一併究審朕辦理庶務從不豫設成見凡有重大情弊莫不自行敗露卽如莊有恭題參段成功本進呈時朕閱情節可疑交軍機處題奏嗣經高晉齊擬舛謬親加指駁遂得實情至段成功虧空一案伊等自以隱飾爲得計不期事

閱年餘仍然水落石出可見欺誑營私之事天理難容日久自然發覺不獨內外臣工均當深知畏懼卽朕披覽此等案牘益覺彰輝昭然如有使之者亦用自惕然矣著將此通諭中外知之尋四達彰寶覆奏段成功僅一縣令且在陽曲半載輒虧空銀一萬兩以外則平日結交餽送必有隱情且查出庫簿開載幫銀州縣共三十二處在交代限內卽能彌補足數苟非上司授意焉能迅速齊全容再逐層根究庶無滲漏再段成功升用同知離任時係鏜宜祿接署因鏜宜祿旋升甘肅平涼府知府未經收清出結但侵虧何項及如何濟交還庫各情由該著令必知詳悉亦應咨提解晉質審以成信讞得旨旣已水落石出不難窮源到底惟應得其實情少有假借惟汝二人是問○調明山爲陝西巡撫以吳紹詩爲江西巡撫周煌爲刑部侍郎○以阿甯阿爲山西布政使調吳

虎炳爲山西按察使以揆義爲江西按察使○以勒爾謹爲山東按察使○癸丑 上謁 昭西陵 孝陵 孝東陵 景陵詣

孝賢皇后陵奠酒回鑾○丁巳諭軍機大臣等據劉統勳等將審訊莊有恭朱奎揚孔傳炯供詞呈閱其中情節尙未能詳細推究卽如孔傳炯供係五月間卽將段成功藉端擾累之事稟知巡撫朱奎揚亦供於六月十九日卽同藩司面稟莊有恭至七月初八日始將訪單轉發飭審旣係府司等稟知在前何以莊有恭又稱係伊先得之訪聞至莊有恭原發款單內卽有段成功差後患病諸務廢弛一任家人書役肆行擾詐等語是患病之說莊有恭已先見之紙筆豈得盡委過於屬員著傳諭劉統勳等將以上各情節悉心根究務得實情毋使案情稍有遁飾○庚申 上還京師○辛酉刑部議奏莊有恭原發款單卽有段成功患病之語而具

題參劾復先敘入豫爲將來卸罪之地是此案徇縱實由莊有恭
開其端而孔傳炯朱奎揚揣合意指不加究結莊有恭應照罪該
處死巧言諱免暗邀人心律孔傳炯朱奎揚應照聽從上司主使
出入人罪律均擬斬監候秋後處決得旨此案莊有恭原參段成
功抱病被蒙之處朕初意以莊有恭題參婪索重案巧爲開脫不
過因離任在卽爲此市恩解怨之舉以博去後之思今據審訊莊
有恭及朱奎揚孔傳炯等各供覈其情節莊有恭等並非袒護段
成功而於保舉段成功之和其衷則曲意爲之瞻徇蓋和其衷爲
新任巡撫明德弟兄恐事發累及舉主有礙顏面遂爾心存瞻顧
上司屬員意會色授各相喻於不言因置段成功受賄情事不復
深加詰究妄冀含糊結案若非朕摘發其蒙蔽情形則擾民墨吏
不轉得倖免乎殊不知督撫保舉人員其後有以贓敗者定例不

過降調處分朕從未有以濫舉之故將原保之督撫遵行降革不
過仍行留任蓋以人實難保過出無心也莊有恭等豈見不及此
而必爲之委曲遷就巧行其展轉徇私之術耶至和其衷見在所
獲罪愆則因與段成功彌補虧空一事天理難容自然敗露若和
其衷止係濫舉公錯部議時朕必予以從寬留任何至於革同治
罪乎外省上下和同官官相護積習最爲惡劣若不急爲整飭將
漸啓黨援門戶之弊於世道人心深有關繫朕力挽頽風遇有此
等案件一經發覺惟有嚴加懲創以飭紀綱內外大小臣工各宜
守法奉公痛自湔洗務使錮習一清毋蹈覆轍莊有恭身爲巡撫
屬員視其趨向自應依律問斬著監候秋後處決朱奎揚孔傳炯
究係爲從寬免其死罪發往軍臺效力並將此通諭中外知之○

壬戌 上啓鑒謁 泰陵○諭軍機大臣等劉藻辦理莽匪事宜

拘於書生之見動輒錯謬伊今日所奏三摺閱其情節又俱不知
事體已於摺內批示矣卽如施尙賢以內地民人膽敢與莽匪結
爲姻黨探聽消息實爲漢奸之尤其莽匪滋擾情形該犯自必深
悉若果嚴行訊究斷無不供出實情之理乃劉藻不過草草一問
輒謂嚴鞠無供遽將該犯正法置緊要關鍵於不問復何由知逆
匪底裏乎至孟良土司猛孟容之堂姪召散與猛孟容父子不協
召散遂勾引莽子將猛孟容拏去並欲追殺召丙是莽匪滋擾之
由召散實爲禍首若將該犯拏獲則惡逆無人煽惑賊黨自更易
於掃除劉藻乃欲於旣搗整欠後再剿孟良則昧於先後機宜矣
又另摺所稱孟連地方一聞木匪空溝搭橋之語稟報驚惶不過
無知土練等遇事恒怯略有風聞遂爾張大其事而劉藻旣不深
察遽患其乘虛蔓延又何無識之甚耶此事斷非劉藻所能辦理

著交楊應琚於到滇後酌量情形逐一查辦至所稱遵奉恩旨軫念瘴鄉整兵稍待再圖大舉等語則更大謬前此降旨原以該處如或調兵未齊至瘴盛之時不妨稍待今既集兵七千有餘定期進剿正當剋日迅奏膚功又豈得託言瘴癘忽爾撤兵甯不慮爲遠夷所輕玩乎設我撤兵而莽子或乘此隙進至內地滋事其罪又誰當之况瘴氣所聚並非槩地皆然或此處有瘴彼處卽無則兵行止須越過瘴毒之處便可無患若云煙瘴人必不可觸冒我兵旣畏其氣莽匪又何獨不然豈可爲此遷延觀望之說以誤事機耶楊應琚到滇後一切進兵機宜自能悉心籌辦見在楊應琚尙未及到劉藻此時仍當督促調集之兵奮勇征剿斷不可惑於瘴癘之說輕議撤回再干罪戾著將劉藻摺鈔寄楊應琚閱看並傳諭劉藻知之尋楊應琚奏施尙賢旣與莽匪結爲姻黨探聽消

息其情形自所深知研究卽得實情何至嚴鞠無供乃劉藻將原供刪去並未全行奏出今將原供鈔錄呈覽施尙賢罪大惡極家口亦應緣坐已飭查拏究擬又木邦久欲投歸內地懇內地土司轉達是以莽匪欲搭江橋木邦必先通知耿馬土司應卽迎機允准查莽匪大局已定惟嚴催追捕賊首訪擒漢奸斷不敢苟且了事得旨嘉獎○癸亥吏部議雲貴總督劉藻雲南提督達啓均應照例革職得旨前因劉藻辦理莽匪一案種種錯謬已將伊降補巡撫今據伊屢次奏報覈其前後所辦理無一事能合機宜卽如去歲聞莽匪滋擾土司邊境伊旣親行帶兵前赴思茅自應駐守該處就近調度以期速剿醜類乃輕信何瓊詔等謊報猛往失事之語心懷畏葸託稱整控江有小徑可通內地懼賊竄入邊自思茅退回普洱其恇怯無能實可駭異殊不知思茅爲近邊要地總

督既駐兵鎮守忽爾退避撤回爾不慮見輕於賊匪耶至何瓊詔等渡整控江失事之故由於將兵器捆載行裝將弁徒手散行毫無紀律突然遇賊衝出星散奔逃旋即陸續投歸劉藻始則率報弁兵陣亡張皇失措繼則罪以貪功輕進何瓊詔等以不備致逃豈爲昌勇輕進其顛倒是非前已明降諭旨有識者當無不知其悖謬至其檄調通省兵丁忽謂忽撤漫無成算而節次所奏諸摺可笑可鄙之處尤不可枚舉晉亂乖方實出意料之外設使吳達善在彼亦如此辦理朕早治其罪矣特念劉藻本係書生未嫻軍旅不忍卽加重譴但復令其覲顏尙爲巡撫其何以示懲創亦何以示各省督撫慎重封疆耶劉藻著照部議革職留滇效力所有調兵不合定例糜費軍餉之處將來報銷時俱著落伊賠補提督達啓身係滿洲遇有攻剿逆匪之事自應統率兵弁身先奮往並

將辦理機宜隨時奏報乃伊惟聽從劉藻指使儼若偏裨數月以來毫無調度亦未據專具一摺入告是誠何心提督平日於地方事務固不宜干與以掣總督之肘至於領兵征剿則係提督專責又豈可推諉總督緘默自安竟若置身局外乎達啓亦著照部議革職交與楊應琚令其兵丁上效力贖罪俟軍務告竣再行請旨

○以鄂甯爲湖北巡撫

由禮部左侍郎遷

○以珠魯訥爲禮部侍郎

由副都統

遷

○乙丑

上謁

泰陵回鑾

○戊辰

上還京師

三月辛未諭元清吉斯汗之後裔俱係博爾濟吉特氏而元史謂元帝爲奇渥溫氏彼此不符因令成衮扎布查奏今據稱蒙古台吉等素稱奇岳特後裔係博爾濟吉特氏查閱清吉斯汗時紀載世系之書亦然看來漢字書爲奇渥溫尙屬有因蓋伊等以漢音譯蒙古字故將奇岳特諱爲奇渥溫耳著將漢字史書內奇渥溫

改書奇岳特並傳論成衮扎布該處既有清吉斯汗世系記載檔
案舊錄一分進呈以便史書漢文有應行查對之處改正畫一○
以金牲爲內閣學士

由詹事還

○癸酉諭劉藻辦理莽匪一事措置乖

方畏葸無能已屢降明旨通諭中外矣今日復據奏稱正月初間
染患中滿之證於審訊何瓊詔等時勉強支持不能記憶前後情
節詳究詐僞等語尤屬支離可鄙劉藻於何瓊詔等一案初次奏
報卽已荒唐以後節次摺奏因仍乖舛而於審訊定罪之處全然
昧於事理此皆伊庸懦無識所致豈託言患病所能解免况前此
並無一語奏及有病今乃忽爲此奏明係自覺前非希圖掩飾所
謂欲蓋彌彰其誰信之若使患病果實則必由於驚恐使然劉藻
向係讀書明理之人軍務卽非其所長何至遇事漫無主見恇怯
張皇因而沮喪成疾甯不慮人恥笑而尙靦顏爲此奏乎劉藻已

降旨革職無庸交部治罪○諭軍機大臣等阿爾泰等奏金蠻圍
攻額爾斯占巴旺卡卡角地方情形一摺看來此次賊番搶奪額
卡該處土司未免驚惶失措金蠻在諸番中雖稍強橫若九土司
果能齊心協力聯絡聲援不難奪卡進攻搗其巢穴自屬以蠻攻
蠻之善策但恐土司等因連次挫衄心存畏沮遂爾聞風輒怖裹
足不前致金蠻益得肆其猖獗究於番地有礙此等邊方小醜不
過自相殘殺並未敢稍侵內地不至用大兵申討若僅僅小試兵
力又恐於事無裨然金川所攻者非各土司之地乎苟人自爲保
亦不至失其土地若董之以官則各土司方且以爲當官差而猶
豫日生氣漸餒而勢漸渙不肯奮勇攻拒久之將孱弱難振此亦
不可不告之以爲伊等之故也況以蠻攻蠻止當用其力而不可
使之知若坐視其敝而不爲之經理伊等或窺見意指豈肯復爲

我用此非天朝控馭番夷之體該督提等當詳察機宜或於攻勦之時量增賞恤以勵其心或於駐防處所酌助軍聲以壯其氣俾土司兵目有所恃而不恐立效自當較易但須坐鎮運籌不動聲色方合事機著傳諭阿爾泰岳鍾璜將該處情形悉心籌畫斟酌盡善據實妥議覆奏尋奏即卡雖狡詐強桀僅於鄰近單弱土司侵其一二碉卡無須大兵申討各土司如松岡梭磨卓克基沃日距金川遙遠革布什咱兵少止可隨眾攻守綽斯甲布小金川地勢兵力堪與金川爲敵因即卡未大挫衄觀望不前黨壩巴旺貧懦番民甚少且賊番據險下攻則易而黨壩巴旺仰攻則難見擬擇土練兵之精壯者分撥黨壩巴旺地方助其軍聲果能奮勇攻勦量增賞恤至綽斯甲布小金川等土司若能於防守外奮力進攻亦可使金川挫衄已諭以進攻獲勝不但可分其地兼除伊等

子孫之害總使金樹分投抵禦黨壩巴旺即可乘虛而入得旨覽
○丁丑 皇五子榮親王永琪薨○戊寅 上臨 皇五子榮親
王永琪喪次賜奠○諭軍機大臣等劉藻奏二月十二十三等日
攻剿猛籠葫蘆口連破賊營數處及得猛籠土城木寨十餘座跟
查賊蹤潛走猛歇兒在進兵追攻等語小小克捷尙無當於攻剿
大局此時楊應琚計已到滇一切機宜自能妥協籌辦見在既連
破賊營數處賊匪潛逃卽宜乘勢鼓勇直前搗其巢穴以期淨掃
根株况調集之兵多至七千餘人軍聲甚壯尤當勦其銳氣迅奏
膚功斷不可惑於瘴盛之說必待秋冬再舉以致遷延時日坐失
機宜至莽匪見已竄匿務當悉力窮追不容刻緩而兇渠所在尤
當躡迹追擒毋任漏網但摺內旣稱賊蹤潛走猛歇爲整欠之門
戶從此卽可直搗整欠賊巢又稱總兵華封與參將哈國興由猛

混攻破賊營之後直達猛遮猛阿莽匪聞風遁據孟良以爲巢穴等語似莽匪賊巢不止一處抑係賊蹤潛匿處所傳聞不真不可不偵邏得實毋輕信詭詞致有疏縱或當督兵分路追剿或扼其要隘併力殲擒著傳諭楊應琚就彼處情形詳悉深籌剋期報捷劉藻摺並鈔寄楊應琚閱看尋奏劉藻在滇九載於邊情未細心訪察以致遇事茫無調度查煙瘴有無輕重原不盡同非槩地皆然已飭兩路軍營乘此兵威直搗巢穴不許藉口瘴發再查孟良整欠賊首原係兩路勾結至九龍江會合孟良係召散占據整欠係素領散撰賊巢得旨覽奏俱悉○己卯諭據舒赫德奏訊問和其衷代段成功彌補虧空一案供出伊前赴熱河陞見時係段成功代雇騾腳又帶信令賈皮張共用銀九百八十兩回任後先給還四百八十兩段成功臨起身赴任時又找還銀五百兩等語前

因段成功虧空何以各上司竟無一人舉發其事甚至和其衷給銀代爲湊補早知其平日必有交結餽遺之事今據供認情節果不出朕所料和其衷身爲巡撫乃令屬員代辦驟腳皮張等項其罪已無可逭且恐所供尙有未盡之處而其收受段成功餽送更有不止於是者和其衷平素爲人頗近深刻若非與屬員有交結之事豈肯爲其墊銀彌補且又豈不知濫舉匪人之處分有限而不據實參劾轉爲之委曲周旋乎又據和其衷供段成功平日與通省州縣俱有交接其自行央懇幫助之處藩司知府俱屬知情又向劉墉面催兩次據稱見在嚴催彌補等語則是段成功彌補虧空文綬劉墉顯係通同掩飾其是否授意各屬幫補其平時有無收受段成功餽遺之事均須徹底根究和其衷身任巡撫乃於保舉之員有受賄情事所繫於吏治官常者甚大文綬係藩司大

員劉墉係專管知府寬爾串通一氣彌縫欺庇如此上下和同舞弊充其伎倆將何事不可爲和其衷已經舒赫德委員解往山西段成功亦據江蘇起解赴晉對質之下自應水落石出但此等情節重大恐四達彰寶未能根究底裏著傳諭四達等於和其衷解到時先行嚴鞫確情一面奏聞一面卽著四達押帶和其衷段成功分別解京候審文綬劉墉並著分別解京審訊至案內有必須質證要犯著四達等酌量解京其干連應訊之人及幫銀各州縣卽著彰寶就近查審分別究擬至文綬前已降旨革職尙謂其咎止於失察是以加恩賞給郎中銜前往庫車辦事今既有此情節不可復爲寬貸已另降旨將伊革去職銜矣劉墉係大臣之子若與段成功有餽送情事尤爲罪不容誅四達等儻因此稍有瞻徇斷難逃朕洞鑒諒伊等亦不敢爲他人任咎也舒赫德原摺及和

其衷親供著鈔寄閱看將此傳諭四達彰實知之○丁亥 上親耕藉田○諭據常鈞奏劉藻於三月初三日夜間自刎傷痕甚重氣息將絕見在醫治調理等語此事實屬大奇劉藻辦理莽匪一案種種錯謬不可勝舉朕因其本係書生不嫻軍旅所以加恩保全者倍至始而調補總督繼而降爲巡撫及至審理何瓊詔等一案以失律脫逃之人反以冒昧輕進定罪乖舛已極且官兵忽調忽撤全無紀律始降旨革職留於軍營效力以示懲儆然所辦亦止於此並未有將伊治罪之意前後所降諭旨中外其所聞知原不屑以軍務大事於伊過爲吹求劉藻自當倍加感激於楊應琚未到之先督率將弁益加奮勉以期軍務速竣方不負朕始終矜全恩意乃正當進兵得勝之際竟無端忽爾自戕實出情理之外劉藻身任封疆見在統兵進剿逆匪所屬將弁俱視其指揮乃無

故輕生軍行要務將欲委之於誰若非朕早令楊應琚前往接辦則軍務兵弁竟無所統屬或因而軍心惶懼偶失機宜豈不貽誤國家大事劉藻旣統官兵卽與主將無異如前者兆惠明瑞於喀喇烏蘇被圍時勢懸呼吸若伊等彼時略無主見畏葸捐軀則全軍將不可問又安望其成大功乎設使劉藻因調度未協軍行或有失利遂致抱慚畢命情尙可恕見今猛籠等處俱已克復猛獸猛混諸路亦俱攻破正宜乘勝勦洗賊巢之時有何窘迫竟至於此無論屢次降旨傳諭並未有加伊重譴之語卽使果欲將伊治罪則國憲所在爲大臣者亦當靜候成命以伏刑誅又豈可效匹夫之見豫辦一死以逃法網劉藻向係讀書明理之人豈於君臣大義全未講明耶從前朕於劉藻曲從寬典實係格外矜全今伊無故自刎罪愆實由自取不可不加以嚴懲見據奏劉藻尙未氣

絕楊應琚到普洱時可撥醫速爲調治俟傷痕平復卽傳旨擊問
將伊因何自刎之故詳悉嚴訊奏聞明正其罪又據奏劉藻自刎
後書桌上有紙包一封面寫三月初三日到硃批摺四件廷寄一
件一併恭繳等語恐外邊無識之徒疑硃批及廷寄內或有嚴旨
督責勒令自裁之處今四摺具在一爲請安其三皆隨事批諭而
廷寄尙係令其不可存五日京兆之見一切並須實心經理之諭
則劉藻此舉之荒唐可詫眾人當亦不能爲之置解也著將常鈞
奏摺及代繳硃批摺四件廷寄一件槩行發鈔與眾閱看並將此
通諭中外知之○己丑諭前以歷科舉人積次壅滯思所以籌辦
疏通俾得及鋒而試特降旨令於會試時揀選引見候朕分別錄
用乃朕嘉惠寒畯格外加恩與尋常揀選下第者不同見在士子
聞風踴躍雲集京師視歷科應試者爲數倍多若循例於榜後始

行揀選引見則伊等守候需時未免艱於旅食朕心深爲軫念莫若卽於月內定期揀選列爲三等其應引見者候朕於 時享

常寧齋戒進宮時卽行分次帶領引見亦省其赴圓明園車馬往來之費其入選人員內榜發中式進士者原有揀擢甄錄之途而挑選未入者下第後卽得遊程歸里不致久滯都門於寒士尤爲有益至前經太學士九卿等議奏按省分之大小酌定人數多寡雖比較向例量爲加增而覈計止七百餘人尙覺限於成格爲數無多並著廣爲挑選其列在一二等者統以二千人爲率分別簡用其年逾七十以上者著查明具奏候朕酌量加銜俾得普被殊恩各遂其彈冠慶幸之志副朕體恤士林樂育羣才至意著派簡親王裕親王誠親王和親王劉統勳阿里衮陳宏謀託恩多李侍堯福隆安公同遴選該部遵諭速行○大學士管雲貴總督楊應

琚奏莽子一種素出爲匪潛入土司境內上年係分兩路一從左進由猛彝等至小猛倫橄欖壩渡江攻破九龍江蔓延至猛混一從右邊打樂而進攻破猛遮與左一股莽匪會合焚毀附近村寨延至整控皆因孟艮應襲土司召丙之堂兄召散謀奪其地句結莽子打破孟艮召丙逃至南掌國後又至內地土司猛遮藏匿前經提鎮同請發兵而劉藻含糊其事僅令附近土練前往以致賊益猖獗輒請由思茅退回普洱今參將彭雄楚等連次克復猛籠猛混總兵華封克復猛遮內附土司境地廓清已出隘進勦孟艮景線等處總兵劉德成打破外域猛歇猛堪見俱催令乘此搗穴盡絕根株不許藉言瘴氣漸發稍有疏漏得旨入境卽能得其領要何愁此事不辦欣慰覽之○壬辰以瓦爾達爲盛京戶部侍郎

由大理寺卿遷

○丙申楊應琚奏據總兵劉德成報稱參將劉明智等於

三月初四日進剿與整欠相近之猛辛斃賊數十名帶傷者無數
生擒莽匪十八名搶獲木城三座一面接剿山箐相機前進查猛
辛距整欠百餘里莽匪倚爲門戶今副將孫爾桂已抵整欠劉德
成亦將抵大巢莫若令提臣達啓將擬攻猛勇一路官兵亦親身
率領進攻整欠三路協剿賊巢不日可平並於隘口堵截勿任漏
網至華封所攻孟良亦係賊巢且有召散首惡在內此路應令專
攻不必再分其勢至賊匪中如有廠棍漢奸在內尤須生擒活口
以便解赴內地根究懲治得旨諸凡皆妥佇候捷音○己亥諭前
因歷科舉人銓選壅滯特命揀選分別錄用廣爲疏通其年齒衰
邁難以服官任事者並令查明奏請量予職銜以慰其寒窗攻苦
之志今據王大臣等奏各省舉人內驗看及自呈實在老邁龍鍾
不堪民牧並不能司鐸者共六十餘人此內八十以上者著加恩

賞給六品京銜七十以上者著賞給七品京銜六十以上及雖未及六十而驗其實屬衰頹者著賞給八品京銜俾頽齡寒賤均沐殊榮以副朕格外優恤至意○是月河南巡撫阿思哈奏相國寺建自北齊爲豫省名藍祝國保釐之所年久倒塌仰懇酌發帑金重修敕賜嘉名得旨好可於公項內酌動旣經復修不可圖省減其舊規也修成時繪圖來請名可也○楊應琚奏據華封呈報官兵於猛腊猛麻四山搜捕餘賊已被兵練截殺又參將哈國興帶領兵練並飭召丙頭人在大猛養堵禦截殺土練先由猛養後路進攻莽子三百餘人在大猛養紮營占據當經攻敗賊已逃回孟艮至大猛養大小頭人百姓等原係召丙舊人見已招來投順查係大小二十三寨頭人二十三名夷人男婦千二百餘名口尙有各處山箐夷人未經到齊令召丙清查安插哈國興卽自猛麻一

路進勦華封亦進勦孟艮查大猛養本係外夷應襲土目召丙所屬前爲伊堂兄召散等占據今旣經召丙招降似應准其投誠其中如有前已順賊擾害邊境抗拒官兵者仍查明治罪並飭華封將孟艮賊巢勦平擒拏賊首召散五定瑞凍召猛烈務獲得首是此最不可姑息若兵到投降兵撤復叛成何事體總之此番旣用兵威不可苟且了事又奏據劉德成報稱三月初五日潛抵整欠江邊紮筏搭橋飛渡至城遂奮勇攻進賊人不能相顧殺死無數連日接躡近巢已無匿匪但附近整欠賊徑繁多見復各路接勦得旨嘉獎又奏據華封稟稱三月初八日領兵至邦籠箐令哈國興等進攻賊匪隨拒隨退又分遣兵練由賊隘左右深箐潛至山梁初九日賊潰遂乘勢砍柵破營一座獲首五十餘級槍斃擊斃二百餘人初十日兵至孟艮壩口之夏法街分路進攻抵孟艮城

砍開盡係空營追至猛引等處亦無蹤迹并兵同召丙四山技捕
得男婦八十餘名口其孟良土城係依山空濠周圍約十一二里
得賊時倉糧已自燒毀惟得牛百數十隻當交召丙收用惟召散
召猛烈召猛珍尙未獲傳言逃赴阿瓦已派兵嚴拏得旨知道了
卽果逃至阿瓦亦應向彼勒索不可苟且了事又奏前以整欠爲
剪賊平定之區若聽其荒棄恐無業莽子潛聚滋事請令叭先捧
管轄照甘省土司例給指揮職銜並以孟良係召丙故土請兵除
匪得復舊業應更傾心向化可否賞給內地土司職銜業經奏聞
今孟良賊巢已得召丙如准爲內地土司與叭先捧一體給以指
揮使職銜俾地土皆附入版圖伊等自長爲臣僕至整欠孟良兩
處地方及原管各堡寨多木田有業夷戶已散應令招來歸附其
並未從賊者卽爲安插俾速布種其兩處賊首仍飭該鎮嚴行勦

捕與召丙先捧協力擒拏得旨諸凡妥當如所議行又奏整欠孟艮賊匪兩路句結孟艮係召散巢穴整欠係索領散撰巢穴整欠賊首六人已除其四惟召散乃此案構釁渠魁已飭委哈國興等追拏再召散殺死召丙之父占踞孟艮召丙與伊原係深仇並令商同追緝得旨如此認真辦理方是

夏四月甲辰刑部奏參革蘇州同知段成功在陽曲縣任內恣意侵蝕庫項數至逾萬與徇縱營私之巡撫和其衷均應一律擬斬並請卽行正法扶同容隱之藩司文綬知府劉墉應擬斬監候徇庇劣員之臬司藍欽奎等已經革職均無庸議得旨段成功著卽處斬和其衷著改爲應斬監候秋後處決文綬劉墉並著從寬免死發往軍臺效力贖罪藍欽奎富勒渾著該部帶領引見再降諭旨○乙巳賑盛京被水官莊並免額賦○丁未以莽匪平免雲南

晉勝等十三土司地方本年額徵正耗銀米及猛籠舊欠銀兩○
壬子諭向來新進士殿試朝考後復派王大臣驗看分別等第原
因人文並重且使邊方遠省名次在後者亦得均與館選也但思
進士原係通行引見其人可造與否朕皆臨時甄別錄用自可無
庸豫爲揀選嗣後新進士引見時著各按省分仍依甲第前後分
班帶領並將上次每省錄用人數詳晰開單呈覽如有朝考錄取
者並於綠頭牌及排單內註明其如何分省分日引見之處該衙
門臨時酌辦奏聞○甲寅楊應琚奏莽匪一案原屬不成事體但
向來聚匪無多僅於土司境內需索財物糧米無識土司狃於便
安亦卽賂以財物並不呈報嗣因外域年年殺奪夷戶離散不能
種地僻壤收成又薄無業莽子艱於覓食以致賊首召罕彪率眾
赴外域之整賣六官暨南掌國之潑邦均被燒掠蔓入邊地土司

所管猛籠地方其時莽匪僅二三百人而沿途脅從者至二千餘人經文武官調六囤土弁刁鎮猛混土目召彝等率土練來助剿召彝等被殺總兵劉德成會商知府請添官兵進攻前督臣吳達善未准嗣召罕彪被槍身死餘賊退去未經嚴懲劉藻接辦之初該鎮等具稟莽匪盤踞九龍江偏近土境亦批令撥練協逐不可擅動官兵輕入夷地此從前之實在情形查莽匪既敢糾眾肆擾彼時卽應嚴勦示懲乃惟令土練堵禦並不派撥官兵督率進剿致賊無所顧忌誠由平日不能實力整頓雖地方官據實稟報督臣旣不認真查辦又不令官兵對壘其咎實在吳達善等諭雲南莽匪滋事之由朕料必因歷任總督平日姑息不能實力整頓所致因降旨楊應琚令其據實查奏茲據奏到莽匪於乾隆二十八年間卽已侵擾土司境內彼時吳達善據總兵知府稟報僅批撥

兵防禦不令與賊對壘遂致伊等積玩無忌等語怯懦者必有以
吳達善爲持重不生邊釁爲是者不知督臣膺封疆重寄似此養
癰貽患致令匪徒敢於跳梁邊境釀成事端所謂持重不生事者
安在今賊巢雖已剋平而前此辦理不善之愆難爲曲貸吳達善
著交部嚴加議處楊應琚甫經蒞滇辦理動合機宜見在根究賊
首逃匪處所四路設法追擒並籌辦善後事宜俱屬井井有條深
可嘉予楊應琚著交部議敘夫以本係易爲之事使劉綎居此亦
可以告成功而邀恩敘乃畏怯急遽以致自裁爲措紳羞不亦大
可笑乎所有楊應琚奏到各摺並著發鈔諭軍機大臣等楊應琚
奏賞給土目叭先捧指揮職銜管理整欠之處業經軍機大臣議
覆降旨准行該督辦理莽匪動合機宜見在籌畫善後事務尤能
井井有條朕心深爲嘉悅已於摺內批示並降旨交部議敘伊孫

楊茂齡昨交領侍衛內大臣帶領引見已授藍翎侍衛矣楊應琚
著再賞給大荷包一對小荷包一對藥錠一對以示優眷著再傳
諭知之○楊應琚奏查召丙父猛孟容世居孟良弟召猛必以滋
擾夷民被逐攜子召散住卡瓦身故猛孟容人本無能整欠大頭
目素領散撰兇惡常至孟良欺凌召散謀占孟良以一姊一妹給
莽匪召猛烈爲妻所結莽匪被官兵剿滅見恐召散或赴卡瓦藏
匿已飭令召丙遣人至卡瓦查拏又莽匪曾至南掌國潑邦地方
焚掠召散等必不投彼藏匿孟良整欠二處已留兵各八百名猛
撒江口係威遠順甯門戶應將原駐守備一員把總一員兵二百
名暫留駐其餘官兵士練悉撤得旨處處留心條條有理嘉悅之
外更無可諭已有旨交部議敘矣○甲子賜張書勳等二百一十
三人進士及第出身有差○丙寅楊應琚奏查上年召猛烈句結

整欠賊首素領散撰等率領野夷至九龍江一帶將各土司地方
焚掠又前逆犯施尙賢供稱召猛烈統莽于八九百人糾約擺夷
商量攻破猛遮猛阿從猛徇雲州直抵大理又欲從整控江口直
抵思茅等語是召猛烈實罪大惡極之犯茲四月初一日華封探
得召猛烈在猛補界外深山藏匿初三日遊擊豆福魁等帶兵拏
獲召猛烈並家屬共十一名口又召岩一名並家屬共五名口隨
從男婦二百餘名口見檄提召猛烈等親究召散等下落嚴飭躡
緝以期必獲得旨好應行鼓勵示勸者卽行賞賚

五月壬申調珠魯訥爲工部侍郎以諾穆渾爲禮部侍郎

由內閣學士遷

○甲戌 上詣 黑龍潭祈雨○戊寅諭正一真人向係承襲一

品前據左副都御史梅穀成奏請量加裁抑經大學士會同該部
議覆降爲五品第念其自宋元以來承襲已久世守道教卽遇有

過愆亦應抵其人以罪耳不應議及其世襲也然舊例一品班序未免太優遽降五品又未免過於貶損且其法官婁近垣見係四品而伊品秩轉卑亦覺未協今正一眞人旣來朝進京著加恩視三品秩永爲例○己卯 皇十七子永璘生○諭伊犁等處戍守官兵俱已撤回見在該處官員戴翎者甚少伊犁係新定邊疆協領總管等俱係轄兵大員俱著賞戴花翎以壯觀瞻著爲例○辛巳諭朕昨見十五阿哥所執扇頭有題畫詩句文理字畫尙覺可觀詢之知出十一阿哥之手幼齡所學如此自屬可教但落款作兄鏡泉三字則非皇子所宜此蓋師傅輩書生習氣以別號爲美稱妄與取字而不知其鄙俗可憎且於蒙養之道甚有關繫皇子讀書惟當講求大義期有裨於立身行己至於尋章摘句已爲末務矧以虛名相尙耶皇子中或年齒已長聞有書齋名字見之圖

章尙無大礙若十一阿哥方在童年正宜涵養德性尊聞行知又豈可以此種浮僞之事消其見識耶朕昔在藩邸未嘗不留意詩文然從未有彼此唱酬題贈之事亦未敢私取別號猶憶朕年二十二歲時 皇考世宗憲皇帝因辦當今法會一書垂問汝等有號否朕謹以未曾有號對我 皇考因命朕爲長春居士和親王爲旭日居士朕之有號實由 皇考所賜然亦從未以之署款題識此皆和親王所深悉可問而知也我國家世敦醇樸之風所重在乎習國書學騎射凡我子孫自當恪守 前型崇尚本務以冀垂貽悠久至於飾號美觀何裨實濟豈可效書愚陋習流於虛謾而不加察乎設使不知省改相習成風其流弊必至令羽林侍衛等官咸以脫劍學書爲風雅相率而入於無用甚且改易衣冠變更舊俗所關於國運人心良非淺鮮不可不知儆惕朕前此御製

皇朝禮器圖序特暢申其旨曾令阿哥等課誦邇來批閱通鑑輯覽於北魏金元諸朝凡政事之守舊可法變更宜戒者無不諄切辨論以資考鑑將來書成時亦必頒賜講習益當仰體朕之思深計遠矣阿哥等誕育皇家資性原非常人可及其於讀書穎悟自易見功至若騎射行圍等事則非身習勞苦不能精熟人情好逸惡勞往往趨於所便若不深自提策必自習爲文弱而不能振作久之將 祖宗成憲亦罔識遵循其患且無所底止豈可不豫防其漸耶阿哥等此時卽善辭章工書法不過儒生一藝之長朕初不以爲喜若能熟諳國語嫻習弓馬乃國家創垂令緒朕所嘉尚實在此而不在彼總師傅須董率眾師傅等教以正道總諳達亦督令眾諳達時刻提撕勸勉勿使阿哥等耽於便安著將此諭實貼上書房俾諸皇子觸目儆心咸體朕意毋忽○壬午諭嗣後正

一真人來朝並隨帶法官仍照舊例准其馳驛○丙戌 上詣
黑龍潭祈雨○丁亥諭嗣後前往駐藏辦事大臣俱著出缺○楊
應琚奏孟良賊首係召散召猛烈召猛珍五定瑞凍四人前已拏
獲召猛烈又獲召散胞兄召猛養四月十五日獲召猛珍及召散
之母喃審妻妾喃畏喃占丙妹喃交並家屬男婦共八名口在猛
卡深山獲召猛烈妻審英罕係召散之姊幼子交衣妻妹審線亦
係召散之姊並使用男婦五名口查召猛珍亦係召散胞兄除檄
提親訊外仍將召散五定瑞凍設法查拏務期迅獲得旨好又批
嚴催緝獲不可姑息○甲午諭今日國史館進呈新纂列傳內洪
承疇傳於故明唐王朱聿釗加以僞字於義未爲允協明至崇禎
甲申其統已亡然福王之在江甯尙與宋南渡相彷彿卽唐桂諸
王轉徙閩嶺苟延一綫亦與宋帝昀帝昺之播遷海嶠無異且唐

王等皆明室子孫其封號亦其先世相承非若異姓僭竊及草賊擁立一朱姓以爲號召者可比固不必槩從貶斥也當國家裁定之初於不順命者自當斥之曰僞以一耳目而齊心志今承平百有餘年纂輯一代國史傳信天下萬世一字所繫于奪攸分必當衷於至是以昭史法昨批閱通鑑輯覽至宋末時如元兵旣入臨安帝焯身爲俘虜宋社旣屋統系旣亡是昺二王竄居窮海殘喘僅存並不得比於紹興偏安之局乃續綱目尙以景炎祥興大書紀年曲徇不公於史例亦未當因特加釐正批示大旨使名分秩然用垂炯戒若明之唐王桂王於是昺亦復何異設竟以爲僞則又所謂矯枉過正弗協事理之平卽明末諸臣如黃道周史可法等在當時抗拒王師固誅僇之所必及今平情而論諸臣各爲其主節義究不容掩朕方嘉子之又豈可槩以僞臣目之乎總裁等

承修國史於明季事皆從貶固本朝臣子立言之體但此書皆朕親加閱定何必拘牽顧忌漫無區別不準於天理人情之至當乎朕權衡庶務一秉至公況國史筆削事關法戒所繫於綱常名教者至重比事固當徵實正名尤貴持平特明降諭旨俾史館諸臣咸喻朕意奉爲準繩用彰大中至正之道○丙申以邁拉遜爲內閣學士由郎中遷○楊應琚奏滇省內地土司所屬夷民尙皆蓄髮狀貌服飾與外域莽子木匪相似是以莽匪及各野夷入境猝難別識請令沿邊土司地方及新定整欠孟良等處夷民一體薙髮留辨俾遵國制並杜莽匪潤滑得旨嘉獎

六月丙午楊應琚奏外域猛勇頭目召齋召漢喃投誠內附並貢馴象二隻猛勇向係召齋之父管轄前遭莽匪殺死伊父占奪其召齋兄弟隨卽恢復嗣莽匪在外域劫殺召齋等又失故地共圖

報復乾隆二十八年莽匪擾入猛籠土司時召齋等中途截殺旋奪回猛勇地方今願內附實出至誠又有猛竜沙人頭目叭護猛呈稱我所管地方約二十餘里並所管沙人暨莽高共七十餘寨計一千餘戶槩請內附查猛勇係孟艮整欠兩處適中之地此地歸附則彼此聯絡聲息相通且召齋召漢喃人甚勇幹夷眾悅服又素與莽匪爲仇若令協擊匪黨必認真出力至叭護猛等原籍內地廣南夷民流落外夷居住見聞大兵攻克整欠募化來歸邊外夷人種類甚多一種之中又有數種惟沙人止係一種幅員廣闊若准歸附可與整欠孟艮犄角相倚直與南掌老撾接境且沙人武勇邊方得此尤資防範似應准各頭目投順請賞給召齋召漢喃土千總職銜歸普洱鎮府管轄沙人向係雄長一方今來效順請賞給四品銜見在臨元鎮每年派撥弁兵巡查慢丟地方該

處與猛竜路徑相通應將猛竜撥歸臨元鎮元江府管轄至二處所屬各堡寨暨田地戶口數目並如何輸納貢賦之處容查酌具奏得旨軍機大臣會同該部議奏尋議猛勇頭目召齋伊弟召漢喃猛竜沙人頭目叭護猛等率眾來歸實可收沿邊控制之效應准其投誠將猛勇頭目召齋召漢喃賞給土千總職銜由該督發給委牌歸普洱鎮普洱府管轄猛竜沙人頭目叭護猛賞給指揮同知職銜另行題請頒給號紙歸臨元鎮元江府管轄仍照土司之例缺出准其承襲猛勇所進象隻准令入貢從之○辛亥以官兆麟爲湖南按察使由山東糧道遷○甲寅諭軍機大臣等九土司會攻金蠻一事相持已將數載尙無就緒茲詢之岳鍾璜亦未有善策惟奏稱土司中與金蠻最近之黨壩力弱兵單難以抵禦其地處阻遠如沃日等土司大率意存觀望不爲策應而其中綽斯甲布

又與金酋迹涉姻黨不無首鼠兩端看來土司等性多狡猾以蠻
攻蠻之計似難責效伊等並稱金酋備知悔罪歸還黨壩額碩想
請網開一面施恩寬宥等語所奏未得此事要領金川侵擾土司
乃番夷互相仇殺並不敢干犯內地本無庸加以兵威又何罪之
可宥若欲爲解怨息爭之說潛遞消息令其設誓顧恩此不過蹈
緣營虛誕惡習以圖掩飾耳目於事仍無實濟如慮金酋漸肆跳
梁欲大加以懲創則豫籌運糧密偵地利然後厚集兵力分路夾
攻一舉而殄滅之並非難能之事但用兵究屬無名亦不值一辦
至該督平日遣往宣諭之員文職不過府廳州縣武弁不過參遊
都守欲得通達事體者亦頗難其人萬一措辭失當轉致誤事機
而損國體且傳述或有粉飾更不能得該處實情就目前大局而
計莫若阿爾泰會同岳鍾璜親赴該地傳集九土司詳悉開導諭

以金蠻與爾等構釁殘殺並不敢侵犯邊境本與內地無涉爾九土司情願協力攻剿原係爾等自爲保守報復並非中國欲藉爾眾土司之力爲剿滅金蠻之策況金酋自悔罪抒誠以來頗爲恭順並不欲加之申討設彼敢作不靖爲征伐之所必及則以國家全盛之勢鋤強誅暴不過一舉手之勞其事無難立就卽如準噶爾之強橫諸回部之驍悍不數年閒悉已剿平收其疆土爾等豈不聞知何有於金蠻取之更不啻摧枯拉朽奚藉爾眾土司之助力乎至爾九土司地廣人眾如果齊心奮力聯絡聲援抵敵亦非難事豈有合九土司之力不能制一金蠻轉使小醜恣其猖獗之理此皆爾等各懷猶豫畏縮不前其中又有暗存瞻顧之人以致眾志不齊事功難就爾等自爲計尙不肯同心盡力朝廷豈肯無故發兵爲爾等雪仇洩忿乎爾等如此因循觀望致金蠻得肆鴟

張勢必近者先被其併吞而由近及遠漸遭蠶食甚爲非計此亦爾等自貽切膚之患於天朝毫無所損且俟金蠻將爾眾土司盡行占踞卽當特發大兵搗平金川巢穴並將爾等地方槩行收取改土歸流以永靖蠻服若爾九土司中敢有與金蠻潛行勾結稍犯邊疆者卽將干犯之土司先行殲滅再行剿洗金蠻以申國威而昭炯戒朝廷之大旨不外乎此其禍福利害一任爾自行快擇毋貽後悔如此明白申諭則九土司必知猛省當不致復蹈從前故轍並可察伊等情形若何得其梗槩以定進止至督提大員親臨該地卽金酋未必不懾然畏服或可召之使來與九土司同聽約束俾知感悔輸誠否則阿爾泰等竟直入其境剴切曉諭以彰威德亦無不可然須至彼酌量時勢隨機應變非有一定形迹所能豫爲籌度也見已令岳鍾璜回川著將此先行傳諭阿爾泰俟

岳鍾璜到日卽會同前往悉心妥辦具奏至見在該處情形若何或有應另須籌辦之處並著迅速據實奏聞候朕再行降旨○乙卯諭御史劉天成奏薦舉無許空言以杜冒濫一摺所稱今之薦舉人才不過謂精明強幹有守有爲通套之語而於平日居官事蹟毫無指實請嗣後督撫薦舉人員務必確切著明事蹟如虛卽坐罪舉主等語其言尙爲近理在該御史之意以爲必著明事蹟始有實際但所云實際者亦不過興學校行保甲等事仍屬空言無補卽如保甲一事有司如果實力奉行何至地方遇有匪徒逃犯不能迅就盤獲耶究之有治人無治法不在虛設科條使徒循具文以課吏於實政又何裨益乎若因和其衷保舉段成功一案謂凡督撫所保之人皆不足信則又未免因噎廢食夫段成功侵帑不法未嘗不終歸敗露明正刑章亦足以昭炯戒豈有因此一

人之獲罪而疑凡薦剡之員皆由奔競亦無此政體且使天下
皆如段成功之輩專以逢迎干進爲事則段成功之案又何由查
察得實乎至摺內稱賢能本屬兩科能吏足以理國事而賢吏乃
以培國脈之語則謬妄實甚夫賢能理本一致豈能歧而爲二設
官所以養民卽銓數刑名何一不關斯民要務能者譬蠶裕如聞
閭陰受其福非賢而何周書推賢讓能又曰舉能其官不聞釐爲
二事右賢而斥能也若如劉天成所言則是碌碌無能之徒居官
一無所表見轉得自詡爲悃悃無華不知其於地方公務廢弛已
復不少如是而號爲賢員民生其又奚賴若督撫所薦不公謬以
小有材者爲能或且夤緣奔競則言官風聞原有參奏且朕所簡
任督撫大臣以及兩司道府亦皆擇其能理民事者而用之果皆
能於其職則大法小廉吏治自有成效此卽賢也劉天成之意不

過爲庸懦者流文其陋劣而強判賢能爲二支離害理且誤襲前人撫字心勞之說掉弄筆頭以逞其猥鄙之見殊屬瑣屑總之朕理庶務惟求實際似此撫拾空言有虛名而無實益者一槩不足動聽劉天成著飭行○辛酉諭軍機大臣等前據楊應琚奏辦理莽匪一案已將賊黨召猛烈召猛珍及召散親屬俱各擒拏惟賊首召散等尙未弋獲見令總兵華封劉德成分路搜緝等語莽匪巢穴業已埽除賊黨並就擒捕惟召散等竄身逃匿原屬釜底游魂不難計日擒戮若因此一二小醜令總鎮大員統兵搜捕久稽時日旣徒致虛糜軍餉且其事亦不值如此辦理該督自奏明追捕以來已兩月餘曾否緝有蹤影未據續報儻此時召散等業已就擒自可竣事若尙未拏獲卽應將該鎮等所領官兵撤回另籌設法躡緝諒此等逸匪經勦平懲艾之後縱使苟延殘喘斷不敢

再行滋事設使稍有蠢動亦不難再行查辦以淨根株著將此諭
楊應琚等知之並將見在搜捕情形若何據實覆奏尋奏土司叭
先捧人雖勇往尙欠老成是以留整欠官兵二百名覓於內地土
司內選擇能幹土目給土千總土把總銜令分管各猛地方凡事
與叭先捧商辦俟布置停妥將兵撤回惟孟艮路通木梳木邦見
籌辦木匪似應留兵彈壓堵禦至召散逃往阿瓦詢知緬甸係眞
阿瓦其城卽謂之阿瓦城見飭土司繕寫緬文前往索取得旨萬
里以外之事不可遙度卿當相機勉力爲之○乙丑諭督撫大吏
向不令其歲時進奉屢降諭旨甚明其有以土物充貢如紙筆香
扇等類尙可召備賞賜之用亦藉以聯上下之情從不使其購珍
奇以滋糜費此中外臣工所共知者昨廣東巡撫王檢賈物內有
小珍珠一項甚爲不取夫珠寶饑不可食寒不可衣於實用有何

裨益業令奏事處發還恐各督撫尙有未能盡喻朕意者著將此明白通諭知之○戊辰諭彰寶題參平遙縣知縣李玳馨審擬縣民雷正宇擲傷總麻服兄雷宗乾身死案內刪減兇犯狡供卸罪情節請予革職一本所辦殊屬過當此案雷正宇與雷士俊酒後忿爭拾葢盤碎片擲打誤中雷宗乾殞命該縣李玳馨親驗時雷正宇與伊父雷全仁商謀卸罪捏供雷士俊用刀扎死而仵作亦以刀傷混報經該縣驗明傷口參差究出本係葢器擲傷實情隨即搜起葢片比對相符雷正宇始無可置辨俯首伏罪是該縣辦理此案並無冤縱且因比驗傷痕訊究得實不爲誑供所蒙尙屬留心勘讞之員至該犯等從前狡賴雷士俊用刀扎死之處本係誑供旣已審得實情卽非此案喫緊關鍵原可無庸申敘今該撫以該犯父子屢次藉詞狡辨謂該縣刪減初供所致殊不知地方

官辦理讞牘於緊要情節自不容妄有增刪致滋疑竇若此等兇犯狡賴之供定案時刪去以省繁渥自與妄改初供者迥別豈可過事苛求至該縣於此案失察書役犯贓一節自有應得處分但究係公罪卽交部議亦不過止於降罰乃該撫遽以爲昏庸溺職卽請斥革何以服該縣之心督撫職任封疆察吏當分涇渭如果係庸妄劣員自應立登白簡以肅官常如此等詳愼讞獄之員縱小有過愆尙堪造就當使瑕瑜不掩以昭懲勸之公若指摘微眚輒行劾罷將有司更代紛煩屢經新手地方公務必多貽誤且使凡爲州縣者意存顧忌一切案件轉致顛預了事不肯悉心研究求所關於吏治民生者甚大朕於內外章疏卽尋常題達事件亦必披覽周詳此案若非朕細心體察則李玳馨功罪幾無由別白該撫所辦不大失情法之平乎督撫等率屬宣猷當思爲國家愛惜

人材以收羣力之效嗣後糾劾屬員務須確當其罪期於無縱無
苛用副朕整飭官方培勵羣材至意著將此通諭各督撫知之彰
寶此本著發還

東華續錄

乾隆六十四

臣王先謙敬編

臣周翰蕃恭校

秋七月己巳朔撥戶部銀三百萬兩交甘肅備賑○禁各省首縣代辦上司衙門鋪設○壬申停陝甘省捐監例○諭雲南省山麓河濱聽民耕種槩免升科○癸酉諭軍機大臣等李因培奏請來京請訓無可面諭惟所陳湖南屬員賢否一摺殊未允當已於摺內批示矣卽如沈世楓由臺垣簡用外任歷膺司道其爲人朕所深知外貌雖似能辦事其實乃一模稜兩可不肯實心出力之人李因培稱其老成謹慎尙不得謂之過當卽云心地安和亦不離其鄉原本邑至謂其辦理刑名頗盡心力則大謬矣沈世楓循分供職固不致有劣蹟可指若云其精研案牘實力整飭斷有所不

能該臬司前以保舉匪員被議此次又以審案錯誤降調朕因其不肯實力奮勉且兩次獲譴遂照議實降該撫乃諉之州縣不能應手是有心爲之開脫思以取悅下僚殊屬非是李因培素有好高自是而復沽名習氣至今尙未能化甚非封疆大吏所宜該撫見在調任閩省海疆要劇諸事尤當認真不可稍存陋習有負任使若仍不知悛改復蹈前轍決不能曲爲寬貸也李因培著傳旨申飭○丙子 上奉 皇太后啓鑒秋猶木蘭○諭見在特發帑金將京城內外街道溝渠槩行修整工竣後必須妥員實心經理著工部及步軍統領各揀選司官二員都察院保送御史二員帶領引見派出管理仍每年更換○丁丑免經過地方本年額賦十分之三○壬午未刻 皇后崩○ 上奉 皇太后駐蹕避暑山莊○癸未諭據留京辦事王大臣奏皇后於本月十四日未時薨

逝皇后自冊立以來尙無失德去年春朕恭奉 皇太后巡幸江

浙正承 歡洽慶之時皇后性忽改常於 皇太后前不能恪盡

孝道比至杭州則舉動尤乖正理迹類瘋迷因令先程回京在宮

調攝經今一載餘病勢日劇遂爾奄逝此實皇后福分淺薄不能

仰承 聖母慈眷長受朕恩禮所致若論其行事乖違卽予以廢

黜亦理所當然朕仍存其名號已爲格外優容但飾終典禮不便

復循 孝賢皇后大事辦理所有喪儀止可照皇貴妃例行交內

務府大臣承辦著將此宣諭中外知之○庚寅諭軍機大臣等據

楊應琚奏木邦土司呈稱因遭緬酋殘刻情願歸附請俟天兵到

彼卽將緬匪遣來監視之人擒獻並見今召散逃往緬甸已行文

前往索取如其不獻應發兵辦理等語已於摺內批示楊應琚久

任封疆夙稱歷練籌辦一切事宜必不至於輕率喜事其言自屬

可信况緬夷雖僻處南荒其在明季尙入隸版圖亦非不可臣服之境但其地究屬遼遠事須斟酌而行如將來辦理或可相機調發剋期奏功不致大需兵力自不妨乘時集事儻必須勞師經餉或致舉動張皇轉非慎重邊徼之道該督務須詳審熟籌期於妥善以定進止可將此傳諭知之○辛卯諭木蘭英額溝向有湯泉在圍場界外蒙古患病卽前往坐湯近因扎什泰恐致驚走牲畜稟知嚮導大臣具奏禁止改由他路行走嗣後尋常行路之人令由新改路行走如蒙古人有願往坐湯者不必禁止至索約勒濟圍場內亦有湯泉著富僧阿色旺諾爾布一體無庸禁止仍不許尋常行路之人行走○丙申發帑修湖南常德府隄垸○調赫昇額爲湖北布政使三寶爲湖南布政使○丁酉諭據常鈞參奏沅陵縣知縣王元位於被災輕重情形並未確查撫恤辰州府知府

諸重光亦未親往查辦扶同該縣欺蒙飾混請一併革職等語知府知縣所以爲民也而爲民之事莫要於災傷賑恤凡知府請訓無不以是爲諄諄今諸重光竟若罔聞牧民之謂何常鈞參奏甚是諸重光王元位俱著革職但僅令其罷官回籍轉得置身事外不足以示儆戒並著仍留該處差遣辦理災賑事務效力贖罪至此等辦災不力玩視民瘼之員李因培卽應據實參奏何以俟至新撫常鈞始行查辦該司道等亦所司何事李因培昨已降旨交部議處沈世楓業已降調所有布政使赫昇額辰沅道富泰並著傳旨申飭○楊應琚奏補哈大頭目噶第牙翁次子麻哈喃率眾投附又猛撒頭目喇鮮細利解獻莽匪十人均應准其投順並請賞給職銜下部知之

八月癸卯諭軍機大臣等劉藻前在雲南總督任內辦理莽匪一

案張皇失措種種錯謬繼復畏葸自戕是伊係已經革職應行治罪之員將來旅櫬回籍止可照常人歸葬不得聽其家覲顏建立墓碑書刻原任總督及厯官事實欺誑鄉愚著將此傳諭崔應階知之○癸丑 上自避暑山莊巡幸木蘭行圍○李因培緣事降調以莊有恭爲福建巡撫○諭軍機大臣等前以莊有恭題參段成功一案有心徇庇豫爲開脫地步不得明示懲儆是以將伊革職治罪今念其事尙屬外省相沿陋習各督撫似此者諒亦不止莊有恭一人且所犯亦不至若和其衷之甚特加恩免罪仍降旨補授福建巡撫該省撫篆出缺已久李因培到閩未幾今復離任海疆重地未便懸缺久待朕見已啓鑾幸木蘭莊有恭難以進哨著留京辦事王大臣傳諭莊有恭奉到諭旨卽速前赴新任不必至行在請訓卽謝恩原可繕摺具奏也○乙卯諭軍機大臣等

聞內地農民皆祀劉猛將軍及八蜡神伊犁雖係邊徼其耕種亦與內地無異理宜倣倣內地習俗著傳諭明瑞等令其建祠設位供奉亦不必特作一事聲張辦理○銅山縣韓家堂河溢○癸亥諭各省副都統俱與將軍都統一處駐紮辦事其別城駐紮之副都統雖隸將軍統轄一切事務係自行承辦惟察哈爾左右翼二副都統既不與都統一處駐紮辦事而其下復有總管等員辦理呈報伊等不過轉達都統仍須都統裁定徒有副都統之名而無承辦事件轉非設立副都統本意不若裁汰之爲愈著將察哈爾左右翼二副都統裁汰止留一缺駐紮張家口與都統一同辦一切應報應行事件著八旗總管等俱呈報都統副都統辦理在都統既得一協辦之人遇有巡察差務印務亦可有人署理集福卽著調補察哈爾八旗副都統駐紮張家口與都統一同辦事

九月乙亥免直隸宛平等十七州縣二十三年至二十六年通賦

○丙子楊應琚奏接奉諭旨籌辦緬匪事宜臣斷不敢冒昧喜功
惟因緬匪屢次侵擾土司邊境若不乘時辦理恐土境不得常甯
萬里邊疆之外須永圖輯甯之計今緬甸既人心渙散木邦情願
歸順是機有可乘前已密遣土司所屬妥幹夷民潛往彼處將地
方廣狹道路險易暗行詳悉繪圖到日進呈 御覽至豫備調撥
事宜見在密爲布置不令稍有張皇臣擬於九月內赴迪西查閱
永順等鎮官兵卽駐永昌督辦此事臣仰膺重寄固不敢坐失事
機亦不敢輕舉妄動得旨嘉獎○己卯 上駐蹕避暑山莊○詞
石禮嘉爲湖北按察使以李因培爲四川按察使原任湖南巡撫○庚辰
四川總督阿爾泰提督岳鍾璜奏臣等會同出口查辦耶卡事務
於八月二十日起程行抵雜谷腦口外據耶卡差大頭人當噶爾

拉等投稟內稱郎卡前蒙 皇上天恩赦過宥罪本不敢多事惟因黨壩各土司連年擾害我謹依天朝大臣飭諭拆去戰碉退還所掠之人不期黨壩潛來我地暗放夾壩我無處稟訴復來奪占額碉今奉嚴諭自當卽行拆還惟求博嚕古留碉五座保守門戶並懇諭令綽斯甲布與郎卡連姻將兩家邊界清楚至布拉克底所占卡卡角當勸其退還並懇賞給新印賞還自藏回川喇嘛七人開通赴成都及進西藏之路等語臣等諭以嶺上碉座與乾隆十四年所定界址不符不便准行郎卡與綽斯甲布結婚係屬爾土司私事聽爾等自爲說合不便官爲辦理至明正土司失去人口應候查辦爾郎卡旣知感恩畏法惟有安分住牧自守巢穴該頭人等無不戰慄領諾去訖查郎卡一聞臣等出口巡邊之信卽差人迎稟退地還碉稟詞雖屬懇切臣等仍當親至其地示以威

稜曉以利害如果感悔輸誠卽飭委員督令退還各處碉卡並取各土司收明退還地方印結劃清界址各安住牧耶卡旣與各土司同聽約束將來差人赴省投稟貿易等事似可准其與各土司一律遵行其求還自藏回川之喇嘛亦應給予至金川土司印信見貯司庫恐該酋反覆靡常擬俟察看數月果屬安靜明春再行給發諭軍機大臣等阿爾泰等奏耶卡遣人懇請退碉息爭及查辦情形一摺似有將就了事之意金首原未干犯內地不過與土司互相仇殺本無庸聲罪致討且不值一辦至九土司各懷觀望不能併力進剿以蠻攻蠻之說旣屬無益斷無轉助其兵力代爲合剿之理前諭該督提等親赴該處明悉曉諭原欲令細察番眾情形若何審度事勢以定進止如果耶卡實心畏懼輸誠面求退還額碉安靜守分不敢再行滋擾或可察其悃忱酌量奏辦今該

督提等並未身履其地又未親見耶卡止據伊所遣頭人稟懇之詞信以爲實卽宣諭以後輒云戰慄領諾亦未必果屬真情況其所奪之硯尙未拆毀侵占土司之地亦未退還是其實在畏威悔罪與否尙未可定乃遽聽其所懇奏請給還人口喇嘛並欲給予貯庫印信與眾土司一體羈縻諸事悉遂其所欲爲此和事老人之舉適足爲外夷所輕殊不知蠻性反覆靡常見在不過懾我先聲姑爲乞憐倖免之計豈能保其永遠不復滋事若止圖苟且了局何以尊國體而靖夷情阿爾泰年齒就衰岳鍾璜又復善病設或各存止圖目前之念以爲十數年後皆非伊等所及見不復籌出萬全則是自貽伊戚儻此次辦理不善將來或仍不免跳梁滋擾朕惟原辦之人是問伊等各育子孫家業又豈能保無身後之慮乎總之此事若無從籌辦竟不必置論則可而欲就事完事敷

衍塞責則斷不可著將此傳諭該督提等知之○辛巳諭駐防伊犁兵丁脫逃獲日卽行正法著爲令○丙戌 上奉 皇太后自避暑山莊回鑾○諭伴送貢使禮部司員如有沿途滋擾者督撫參奏撤回另委員伴送著爲令○己丑閩浙總督蘇昌奏臺灣攸武乃社兇番不靖經臬司余文儀等帶同文武員弁率領兵勇於八月二十七日往蛤仔口進剿擒殺番眾三百餘人餘匪四散奔逃勢已膽落卽附近屋鑿獅子等社生番亦不敢結連幫同拒敵臣見在批令該司鎮等或假以招撫誘令投首或直搗巢穴盡殲其眾務使海疆甯謐得旨嘉獎○癸巳諭前句到秋審情實官犯內湖南省饒佐一名以其迴護已過業已予勾嗣因閱看浙江招冊內諸暨縣書吏侵糧一案知縣黃汝亮卽行正法知府高象震承審迴護經侍郎四達等審擬發往軍臺效力因思兩案情事相

類而一真重典一發軍臺同罪異罰不足以昭平允特命速諭該撫將饒佺暫停處決一面令刑部詳查高象震供詞與饒佺案情逐細覈較再行降旨今據查奏高象震因生員陳駒控告書吏侵糧經巡撫批發親審乃並不詳細根究遂卽轉詳復因錢名標等俱未到案心存成見一時迴護前詳遽將原告陳駒詳請斥革至饒佺則明知十串較冊浮多恐干失察處分欲圖迴護授意知縣等改換印串以符徵冊幾至重犯漏網實屬飢法欺蒙是高象震與饒佺雖俱係迴護而情罪迥不相同高象震承審時受人蒙混不能究出實情繼復固執己見仍照前詳率結昏憤無能尙屬無心之過發往軍臺效力已足蔽辜若饒佺授意改串則因袒護舞弊屬員曲爲徇縱以知府大員敢於有心欺罔於法實無可貸著該撫仍將饒佺卽行處決秋讞爲明刑大典朕披覽招冊必詳慎

再三以協大中至正之治雖匹夫匹婦稍有一節涉於疑似者亦必悉心推究俾無枉縱卽如饒佺一犯初疑其與高象震案或相類雖已子句仍令停決以待詳覈今旣查較得實則予以綴首並不爲枉朕於庶務鑑空衡平從不豫設成見輕重悉視其人之自取將此明白曉諭中外知之並使凡爲知府大員者知所炯戒○乙未楊應琚奏臣前因木邦向化緬匪可以乘機酌辦密遣安幹夷人潛往緬甸確探情形茲據回稱緬甸幅員遼闊南通外洋所轄土司二十餘處人民亦眾建城阿瓦地方又名三江城由永昌前往有水陸三路可通間有險要之處木邦蠻蕃二處爲緬甸門戶又伊屬下最大土司緬甸自襲藉牙篡位伊子孟洛孟毒誅求無厭各土司早已解體聞天兵平定莽匪緬人甚爲畏懼又據永昌文武官稟稱探事夷人陸續回稟木邦因前定九月內歸順內

地懇請發兵早爲臨境保護今已近期天朝諒已出兵該酋已將緬匪差來監視之人殺害懇請天朝大人迅速發官兵到境等語臣已一面調撥豫備鎮營官兵三千餘名前赴附近木邦之內地土司遮放地方駐紮俟伊等前來即便受降又查蠻暮地方亦與木邦相埒距阿瓦城不遠該處爲入緬要隘又居上游頗稱險要因知木邦已經投順亦願來歸是緬匪之地愈蹙控制便自無難臣於九月十二日起身前往永昌察看情形如果易於集事卽當乘機妥辦儻木邦歸附之後緬甸亦有向化之機自知悔罪將召散擒獻臣自當請旨辦理斷不敢草率上廬宸衷並將緬甸輿地形勢繪圖貼說呈覽得旨欣悅覽之佇俟佳音餘有旨諭諭軍機大臣等楊應琚奏籌辦緬甸木匪緣由一摺稱木邦見在傾心歸附而入緬要隘之蠻暮亦願來歸伊見赴永昌察看情形儻木邦

等收撫之後緬甸亦有向化之機將召散擒獻當請旨辦理等語所辦甚好木邦蠻慕遠在邊陲今皆懷德畏威輸誠內附該督親往受降順夷情而綏遠徼深爲嘉悅至緬酋距永昌計二千餘里該督既圖其道里悉其情形自當胸有成算今復親至永昌相機督辦必能動中竅要籌出萬全如緬酋此時因所部蠻眾相率內屬亦知懾我先聲願效臣服該督能不動聲色一併招撫歸降固爲妥善若其畏避潛匿卽將召散擒獻則罪人旣得莽匪全局已竣天朝本無事求多於外夷亦可收功歲事儻或怙惡不悛果有可乘之會不致重煩兵力深入而成戡定之功以永靖南服尤爲一勞永逸該督老成歷練遇事素有斟酌一切事宜悉聽其隨時審量妥協經理可耳茲因留心籌畫緬酋招徠木匪不憚勤勞遠涉特賞荷包二對以示優眷如能順時集事招致緬甸迅奏膚功

另當格外加恩用昭酬獎著將此傳諭知之

冬十月丁酉朔諭軍機大臣等據楊應琚繪進緬甸地圖內有附近阿瓦城之罵達喇地方因思康熙年間曾有雲南所進馬達爾名色苗人在馬前導引行走是否卽係圖內罵達喇之人罵達喇附隸緬甸從前並非內屬地方督撫何從致送來京復於何時遣回事越多年無憑查考滇省或有檔案亦未可定其如何遣送往返緣山著楊應琚查明具奏至從前進京苗人內或有二三十歲遣回迄今尙存者均未可定該督見在辦理緬甸若得此等曾來內地苗人就近詢問彼此情形得悉其大槩豈不更爲有裨著將此傳諭楊應琚令其遇便留心亦不必作緊要事件辦理○己亥上奉 皇太后還京師○庚子諭據阿思哈奏徐州韓家堂堵築漫口需用工料業經陸續起運今據高晉等咨稱稽料已足敷

用槩行停運此項物料例應仍給民戶繳價歸款其路遠之處礙難給還請俟商酌妥辦一摺此皆高晉等原辦過當所致漫口需用工料自當按照工程確數估計以濟急需則鄰省辦運既易爲力而事後亦不致籌畫周章豈可蹈河工多備少用陋習令協濟省分徒費採買辦運今阿思哈請將近地稽料仍給還民戶路遠者另行酌辦之處所議亦尙未妥協不知民間物料一經官辦地方官卽照時價給買小民已恐不能盡沾實惠若復將原料給還令其繳價歸款則一出入耗損必多難保無吏胥藉端中飽擾累勢所不免所有豫省停運工料除留該省備用外並可撥山東河工儲爲來年之用如再有多餘仍著解運江省備工槩不必給還民戶以示體恤閭閻之意嗣後凡有採買物料官用有餘者均照此辦理著爲令○辛丑諭問擬發遣人犯越獄卽行正法○王

寅命裴日修等查看江南淮徐等處支河隄工○甲辰諭軍機大臣等阿爾泰等奏自雜谷親至金川康八達地方即卡畏懼率眾跪迎叩額業經退還額碩人口及辦理各情形一摺未免存將就了事之見金酋與眾土司互相仇殺並未干犯內地原無庸聲罪致討且其事亦不值一辦特因九土司各懷觀望不能齊心併力共勦金酋則以蠻攻蠻之策難以復行是以諭令該督提等親赴該處明白曉諭各土司俾其咸知鼓勵合羣力以自相捍禦使金蠻不敢侵擾鄰封如土司等游移兩端致爲金蠻蠶食或潛相黨附則並土司之地收勦之改土歸流永靖邊徼仍令細察番眾環聽之際能否畏悟感奮以審事機或並至金川地界傳諭即卡示以天朝威德規其情形若何以定進止並非欲招致即卡完結目前之局也嗣據阿爾泰等奏行至中途即卡遣人懇請退礪息爭

各緣由朕以該督提等尙未見郎卡之面率信其來人稟額數語
遽令盡如其願未中此事竊要當經降旨詳悉飭諭今復據阿爾
泰等稱親抵金川地方郎卡率領土舍頭人環跪叩首畏罪輸誠
情願將所占額礪山梁並先後所搶各土司人口退還各安住牧
不敢再出滋擾該督提業辦完結並面許以准頒承襲新印及給
還喇嘛人口既已允其所懇自不便復有改移此時亦止可將錯
就錯以完此案矣但該督提如此辦理究未妥善不知蠻性反覆
靡常見在姑爲此乞恩倖免之計果能保其永遠不復更滋事端
耶卽如從前辦理金川時郎卡畏懼兵威歸誠悔罪今甫十餘年
已不能謹守約束尙有肆擾鄰境之事阿爾泰等自問一瞥一提
親臨其地較前此平定之役聲勢輕重若何而謂蠻酋竟誠心懷
惕從此遂與各土司共安住牧永無侵軼耶此奏姑從所請辦理

但該督提等遷就苟安實未能體朕原諭大旨著將此傳諭阿爾泰等知之○諭各省將軍奏事令副都統列名○丁未諭軍機大臣等外省常平捐監事例原令其捐輸本色以備倉儲乃行之年久漸至多收折色承辦官吏不無浮收需索及那移侵蝕等弊自不若在部報捐者轉屬簡便妥協前已降旨將陝甘捐例停止仍令赴部報捐復經查明各省捐監事例未經停止者尙有九省所有安徽直隸山西河南等省見在降旨並著一體停止外其雲南一省產米本少商販又難於接濟福建廣東本地米糧亦屬不敷或取資於臺地外洋或藉給於舫船販運則常平倉穀果能多捐本色自於積貯有益至湖廣一省向稱產米充裕若平時寬餘儲待不特本省有備無患設遇鄰省需糧亦可酌量協撥然止可多存本色不可言及折色且各該省向設常平事例是否實在收貯

本邑見今或已足額無需再捐或尙須仍留本省收納並果否裨益倉儲不致有名無實及啓官吏私徵折色藉端滋弊之處著傳諭各該督撫將實在情形及此事應行應止逐一查議據實奏聞候朕另降諭旨○戊申楊應琚奏整賣頭目召齋約提景線頭目訥賽景海頭目召罕彪各率夷民前來孟良投誠並據召齋約提稱六本頭目召猛齋隨即前來等語查整賣舊名景邁又名八百媳婦國元時曾大費兵力征之不下其景線景海亦外域最大部落今俱歸誠向化似應從優賞給擬將召齋約提訥賽均賞四品宣撫司職銜其景海地方較小擬將召罕彪同六本頭目召猛齋均賞土守備職銜應納賦稅照孟連等土司之例每年徵收差發銀兩得旨著照所請行該部知道○辛亥賜白成龍等五十一人武進士及第出身有差○韓家堂漫工合龍○癸丑論史奕昂朕

念其爲大學士史貽直之子且曾任藩司辦事尙無貽誤服闋來京候補其階級與侍郎相等是以擢用兵部侍郎此係朕垂念老臣格外推恩之曠典伊履任兵部以來屢經召見察其言語舉動雖似小有聰明而其不能安分之意時復流露偶值召對之次諭及兵部大臣大學士尹繼善在軍機處行走不能每日進署託庸年齒近邁且係初理部務彭啓豐又係碌碌無能爲之人鍾音蔣棚亦未能練習部務汝與期成額尙屬解事應隨處留心此原不過令其於日行事件稽覈司員勤惰查察書役弊端而已乃伊恃有此論遽爾沾沾自喜大言不慚遂欲獨侵事權放恣自用意似朕以部務專任伊一人者卽如戶部侍郎英廉裘曰修等召見時朕亦曾諭以傅恆阿里衮于敏中俱兼軍機處爾等當加意經理部務又豈卽以戶部之事專委之二人乎而伊等並未因此稍有

喜事矜張之態史奕昂豈未之見耶昨期成額奏伊在部面斥彭
啓豐有不稱尙書止宜爲司員之語今詢之彭啓豐堅稱史奕昂
並無此言但其平日有願爲外任之意及召詢鍾音則稱實係共
聞因令彭啓豐面爲質對伊始唯唯承認史奕昂此語本屬無稽
彭啓豐亦何妨直陳不諱而乃自居蘊蓄不言人過甘效唾面自
乾則不但選懦無能其居心並欠誠實此又彭啓豐之結習未除
也至史奕昂希心外任如果其材堪任封疆朕豈不欲多得一人
任使卽如鍾音才具並未過人亦經歷任巡撫辦事斷不及周琬而
干咎必
以侍郎之任若史奕昂用爲巡撫其辦事斷不及周琬而干咎必
更有甚於周琬者何則周琬以氣陵人則有之而操守尙可保若
史奕昂則並操守亦不可信矣又史奕昂因朕萬壽會與鍾音同
日進貢物朕以侍郎秩居二品原非分所應進是以一體卻回並

無歧視迨後申飭王檢進貢諭旨內有聯上下之情一語史奕昂未免退有後言向同官遂有我等不用聯情之語前經蔣櫟奏及朕尙未深信及詢之期成額鍾音亦稱實有此語史奕昂如出之有心敢於怨望卽置之重辟亦所應得但朕深知其平素輕率妄談心口多不能相應故不加以深究但其在部甚不安靜總因器小易盈不能承受恩澤本應重懲示儆究念其爲老臣之子姑從寬降爲三品卿銜令其回籍閉戶讀書變化氣質數年後如果改悔自新將來再加恩錄用亦未可定儻在家仍怙惡不悛則是伊自取罪戾耳至其言虛實有無史奕昂亦當自知設使期成額蔣櫟鍾音和同傾軋造爲此語史奕昂不妨據實直陳朕當特派大臣究訊無難水落石出卽治伊等以誣奏之罪斷不肯顛預了事也彭啓豐學問尙優辦事本非所長今復意存模稜並不據實奏

對殊失大臣之體史奕昂兵部侍郎員缺卽著彭啓豐降補並將此宣諭中外知之○甲寅以陸宗楷爲兵部尙書調程景伊爲吏部左侍郎轉李宗文爲工部左侍郎調劉星煒爲工部右侍郎轉程巖爲禮部左侍郎以羅源漢爲禮部右侍郎由左副都御史遷○戊午准各省督撫用紫花印○辛酉調顏希深爲江西布政使錢琦爲福建布政使○壬戌吏部議准大學士管雲貴總督楊應琚奏滇省迤東道轄曲靖等十三府見在普洱府十三土司之外復設有孟艮整欠二土司該道遠駐尋甸稽察難周請於普洱府添設迤南道一員駐紮府城將附近之鎮沅元江臨安三府併歸管轄又永北一府並無屬邑事務亦簡該府設有同知一員堪以管理請以永北府同知改爲掌印同知將知府裁汰至迤東道所轄除撥隸迤南道四府外尙有九府究屬遼遠應將雲南武定二府分隸

鹽道其曲靖廣西廣南開化東川昭通潯江七府仍歸巡東道轄從之○癸亥以申甫爲左副都御史由大理寺卿遷○乙丑禁八旗參領等大員子嗣挑養育兵

十一月己巳諭軍機大臣等常鈞所奏覆審桂陽州民侯嶽添被毆身死一案甚屬含混此案服制攸關或弟或兄定擬生死懸殊斷不宜聽其稍有疑竇前因李因培原奏情節游移是以諭令常鈞悉心研究務得實情乃該撫委派司府會審案情反覆無定且會審之員各存意見持議參差尤屬不成事體該撫如果見侯七郎覆審時翻供之處實有可據何妨將宮兆麟指參乃摺內惟稱會訊之時宮兆麟在坐默無一言則該臬司之是否中心折服無可置辨抑或另有所見不隨同附和俱未可定此等關繫倫常重案司府等既不能審訊得實該撫卽當親提嚴鞫使之水落石出

以昭平允乃復委之一府一縣會審安見此所委之員必能盡無枉縱乎看來此案非常鈞等所能定讞見已派侍郎期成額前往湖北會同定長審理並令宮兆麟將應行質訊人犯隔別解往湖北毋得令其串供狡飾可將此傳諭定長及常鈞知之○辛未賜八世同居陝西三水縣民趙資 御製詩章扁額○甲戌 上幸皇八子永璇第○乙亥諭軍機大臣等據湯聘奏大學士楊應琚在永昌忽患痰證病勢似覺稍重朕亟望其調理速痊設或不能就愈該省見有辦理緬匪事務需人籌畫員缺最關緊要接替頗難其人楊廷璋歷任封疆尙非選懦之流堪任此事但此時未便明降諭旨因思廣西與雲南接壤該督可藉巡邊爲名先往廣西邊界候信兩廣總督員缺見在亦不降旨另授如楊應琚已經痊愈該督可仍回廣東否則卽有旨馳諭該督卽由彼取道迅赴

永昌接辦但滇省邊外向多瘴癘楊廷璋年逾七旬雖精力尙健而調護亦宜留心並著傳諭該督如赴滇省時凡有煙瘴地方不必親身前往以期珍重副朕優眷之意惟在運籌有方不在身先士卒凡事與提督李時升和衷妥辦以得其力爲要所有楊應琚節次奏到各摺一併鈔寄閱看又諭據湯聘奏楊應琚舊時痰疾復發見卽束裝前赴永昌察看病勢等語覽奏深爲廬念已批交該撫令將近况如何速奏以聞因永昌遠隔萬餘里不能遣御醫前往診視今將內府所製十香返魂丹十丸活絡丹二十丸由驛飛寄此二藥素有神驗可以酌量服餌並賜荷包六箇該督務加意調攝以冀速痊一切毋致勞神慰朕眷念至意又諭雲貴總督楊應琚見在永昌辦事茲聞其忽患痰疾甚爲軫念已將內府所製藥丸馳寄以冀速痊但老年病體侍奉有人似更易於向愈伊

子楊重穀見任寶慶府知府距滇尙不甚遠著傳諭常鈞令其卽
速前往看視所有寶慶府知府事務該撫揀派妥員暫行署理○
乙亥楊應琚奏緬夷大山頭目壘管遣弟星榮等猛育頭目坤線
遣子坤巖等猛答頭目衍歌遣子衍轟等猛音頭目衍界遣子衍
宋等先後至駐紮巡放之總兵烏爾登額軍營投誠並獻土物又
前次投誠之木邦頭目呈獻馴象得旨覽奏俱悉又奏臣前在甘
省卽有心神驚悸風痰流注之疾今因自省前赴永昌舊疾復作
見雖力疾辦事而軍務重大臣心神恍惚恐有貽誤仰懇簡員來
滇接辦得旨已命楊廷璋前往佐卿俟彼到時若病勢痊愈亦不
妨留彼多住數日共相籌策必精神復初然後可令彼回粵也交
印一事朕不忍言卿其善爲調攝以慰懸念○丙子賜直隸衡水
縣衡水橋名安濟橋○戊寅李永書以不職解任以楊重英爲江

蘇按察使○吏部議覆貴州按察使高積奏貴州苗獠性喜佩刀
出入每釀人命又孟春男女會合於野擇平地爲月場讌浪終日
暮挈所合而歸名曰跳月應責成地方官嚴禁定以年限處分明
示懲勸等語查苗疆積習相沿惟在隨時化導未便繩以官法亦
難定以限期應令各督撫飭屬設法曉諭庶可漸次轉移得旨吏
部議覆高積條奏禁止苗人佩刀跳月請責成地方官定以年限
處分苗人向化日久耕鑿安恬至其習俗相沿本無庸瑣屑申禁
今內地齊民地方官尙且不能道德齊禮而於苗疆乃欲嚴立科
條紛更滋擾徒屬有名無實甚無謂也著交軍機大臣另行妥議
具奏○乙酉以鄂寶署左副都御史庫車辦事大臣○丙戌諭據明德奏
查辦孔繼袞攜帶空白奉祀禮生劄付審係衍聖公孔昭煥差往
浙江清查族譜令其帶往請將孔昭煥交部嚴加議處並將孔繼

袞等分別定擬一摺所辦甚屬公正國家加恩聖裔禮遇甚優衍
聖公身膺顯爵自當益矢謹慎以承先澤而副優眷卽如承修族
譜一事雖相沿已久越數年修正一次亦止應就籍隸山東確有
支派可考者隨時查輯若其同宗散處各省系次旣屬遙遠勢難
逐一清釐徒使差委之人藉端滋弊嗣後應示以限制至 廟庭
設立贊禮奉祀各生原以肅將祀典自應慎擇本省醇謹之人充
補俾得就近襄助駿奔若令外籍無稽之人濫與其選轉非所以
昭虔恪又豈尊師重道之本意乎孔昭煥年幼無知受人愚惑輒
以空白劄付委交孔繼袞帶至江南覓人填給甚屬不合孔昭煥
著交部嚴加議處其奉祀生禮生等項從前任意充補未免太濫
嗣後亦應酌定額數會同該巡撫學政慎選咨部充補其如何定
立章程之處著大學士會同該部詳悉定議餘著該部覈擬具奏

尋議各祠宇奉祀生節經議定額缺頒給部照今孔繼袞等仍有
濫給劄付應飭交該督撫學政詳察如有額外濫設卽行裁革將
衍聖公所給執照追銷並將見充祀生冊送禮部嗣後山東省祀
生缺出令衍聖公會同該撫學政於嫡派子孫內選補其江浙等
省祀生缺出令各該督撫學政詳查孔氏嫡派子孫頂補仍取地
方官印甘各結咨部換照再各省先賢先儒奉祀諸生有無額收
浮多一體飭查送部其補缺並照見定章程辦理至贊禮生前經
議定直省文廟准設四名皆以生員充設其餘先賢先儒家廟
並無額設禮生之例亦應將從前私給執照追毀至孔氏承修族
譜應遵旨就籍隸山東確有支派可考者隨時查輯毋許差委遠
出從之○癸巳命乾清門侍衛福靈安帶御醫馳往雲南視楊應
琚病○甲午吏部等部議准閩浙總督蘇昌等奏臺灣熟番戶口

眾多應將淡水彰化諸羅一廳二縣所屬番社設立理番同知一員凡有民番交涉事件悉歸該同知管理查內地泉州府西倉同知地方綏靖無事請裁改爲臺灣府理番同知從之○楊應琚等奏據總兵朱崙報稱督兵赴楞木地方與緬匪相遇自十一月十八日接陣至二十一日計四晝三夜並未停息官兵奮勇爭先賊匪四路抗拒該鎮按其險要分路勦殺賊匪抵禦不住俱滾匿山箐及殺死賊匪約共四千有餘奪獲器械甚多得旨知道了十二月癸卯吏部遵旨議覆御史戈濤參奏直隸候補同知王銘琮匿喪引見赴補一摺查該員赴部引見時臣部未將丁憂原案查明聽其遽赴直隸迨服滿咨部又未查明參處請交都察院分別議處得旨知道了此等丁憂人員該部自應查明於引見時奏明扣除乃槩行帶領引見給咨發往辦理已屬不合嗣後凡調取

引見人員內有見經丁憂者該部詳查聲明扣除俟該員服闋後補行引見如有特旨不拘事故卽令引見者不在此例著爲令○召常鈞來京調鄂甯爲湖南巡撫以鄂寶爲湖北巡撫○赫昇額緣事革職以閔鶚元爲湖北布政使○乙巳諭據期成額定長奏查桂陽州民侯嶽添被毆身死一案該州知州張宏燧先審侯學添爲兇手及按察使宮兆麟審出正兇後仍復迴護原招湘陰縣知縣劉善謨長沙縣知縣李蔣奉委會審並不秉公勘訊請旨將該三員革職署布政使驛鹽道熊學驥不與宮兆麟會印兼以會訊並無確供具稟巡撫亦請解任等語張宏燧劉善謨李蔣俱著革職熊學驥著解任一併交與期成額等秉公質訊確情據實具奏其初審未得實情之司道府州各官俱著交部分別議處諭軍機大臣等據期成額等查審侯嶽添被毆身死審明侯七郎確係

此案正兇一摺已降旨將張宏燧等分別革職解任交期成額等
秉公質審至常鈞身為巡撫乃於審理倫紀攸關命案一任屬員
扶同弊混不能查究據實嚴參似此糊塗無識豈復勝封疆之任
常鈞已令其來京陛見湖南巡撫見令鄂甯調補矣至另摺所奏
宮兆麟呈出知府李拔密稟張宏燧與赫昇額營私行賄請將赫
昇額革職審訊等語殊可駭異赫昇額身任藩司命案非其專責
何至偏執成見始終迴護若此或赫昇額與張宏燧別有結交袒
庇情弊定長等或另有訪聞是以徑請革職亦已照所請革職著
期成額會同定長將李拔稟內各情節逐一研訊務使水落石出
令事之虛實輕重毫無遁情以成信讞若常鈞有所交涉亦應審
出實情不可爲之隱飾可將此傳諭知之○允鍾蘭枝回籍終養
以倪承寬爲內閣學士

由太僕少卿遷

○丙午以陳輝祖爲安徽按察使

由直隸天津道還

○戊申諭軍機大臣等據楊應琚奏賞賜藥丸調服後精神長發飲食加進痰氣日就消滅可望復元等語並據湯聘同日奏到實深喜慰該督病甫向愈更宜善爲調攝以冀速痊至楊廷璋見已自粵東起程前赴永昌勦助到彼後湯聘即可回雲南省城專辦巡撫事務所有督臣一切應辦事宜楊應琚此時且勿分心勞頓楊廷璋不妨留住數日公同商辦俾得安心靜養如楊應琚精神業已充復可以無須伙助楊廷璋年齒已逾七旬未便久令遠涉兼顧況兩廣地方事務亦屬緊要楊廷璋即可仍回粵東辦事伊二人俱係朕信任大臣自皆以公事爲重其應行應止之處聽二臣自行面商妥酌可耳朕本日披閱來奏喜不勝言前賜藥丸服之既有成效著照前再行賞給又聞良玉左右手各握其一可療風痰之證今特寄賞玉子暖手二枚該督可隨時擎握

用資頤養並著加賞大荷包一對小荷包四箇珪瑯鼻煙壺一具以誌欣慰著將此傳諭楊應琚並楊廷璋湯聘知之○壬子諭平定伊犁回部八旗陣亡人員均予恩騎尉世襲罔替○乙卯調圖桑阿爲廣西按察使以歐陽永禱爲浙江按察使

由河南河
陝道遷

○丙

辰諭彰寶奏哈密郡王品級貝勒玉素布在山西靈石縣病故等語玉素布宣力多年甚爲奮勉前聞伊患病朕卽加恩賞藥令布政使喀甯阿前往看視今聞溘逝朕心深爲憫惻著加恩賞銀五百兩治喪卽動彼處庫帑命喀甯阿親身帶往賞給伊子宣諭朕旨賜奠仍令吳達善彰寶明山沿途派員加意照料送至伊遊牧處○裁綏遠城副都統增右衛歸化城副都統各一員○庚申禮部左侍郎程巖奏請終養允之○辛酉 大清會典成 御製序曰自 郊 廟朝廷放之千百國荒徼服屬之倫而莫之脩自創

業守文繩之億萬葉矩矱訓行之久而勿之渝非會典奚由哉顧
維聖作明述政府彙陳其有因者卽不能無損與益而要之
悉損益以善厥因則方策所麗乃一成不易之書非閱世遞輯之
書也國家膺大寶命列聖肇興禮樂明備皇祖聖祖仁皇
帝康熙二十三年始敕釐定會典則以時當大業甫成實永肩
我太祖太宗世祖三朝之統緒不可以無述而述固兼作
矣皇考世宗憲皇帝雍正五年申諭閣臣敬奉成編考衷條
繫則以累洽重熙更兼皇祖景祚延洪化成久道不可以無述
而述且未遑於作矣暨朕寅紹丕基祗祗翼翼壹惟法祖宗之
法心祖宗之心發冊披圖罔或徇尺寸會西陲大功告蒞幸
纘承祖宗欲竟之志事而凡職方官制郡縣營戍屯堡觀饗貢
賦錢幣諸大政於六曹庶司之掌無所不隸且我皇考勵精圖

治十三年之閒立綱陳紀復不可無紀以垂永世爰咨館局次第具草乙夜手批是正而誌之曰嚮者發凡排纂率用原議舊儀運篇並載是典與例無辨也夫例可通典不可變今將援典而傳例後或摭例以殽典其可乎於是區會典則例各爲之部而輔以行諸臣皆謂若網在綱咸正無缺而朕弗敢專也蓋此日所輯之會典猶是我皇祖皇考所輯之會典而俛焉從事於茲者豈真義取述而不作云爾哉良以抱不得不述之深衷更推明不容輕述之微指稽典者當瞭然知宰世馭物所由來無自疑每朝迭修爲故事耳若夫治法心法表裏兼賅精之而貫徹天人擴之而範圍今古如往牒所稱惟睢麟足以行官禮者是數典之原嘉會之本也朕其敢不懋諸敢不與子孫臣民交勛諸○是月閩浙總督蘇昌奏屋鰲末毒獅子等十三社俱係內山生番近見攸武乃社

兇番被勦官兵路過各社秋毫無犯眾社番畏威懷德俱請輸誠
歸化並每社每年獻納鹿皮四張小米四石以作稅糧報聞○是
歲朝鮮琉球來貢○會計天下民穀數各省通共大小男婦二萬
八百九萬五千七百九十六名口各省通共存倉米穀三千六百
九十六萬二千四百三十六石六斗九升二勺零